



唐類函
七

帝王部
帝王總裁下
符命
帝誕
奇表
帝系
切智
潛海
殷夏

卷六十一

13
2413
7



13
2413
7

唐類函卷二十二



明東吳俞安期彙纂
明邵陽車大任校訂

帝王部二

帝王總載中

帝王總載中

述 誄 策文 碑

述後漢班固高祖述曰皇矣漢祖纂堯之緒實天生
德聰明神武秦人不綱網漏于楚爰茲發迹斷蛇奮
旅神母告符朱旗乃舉粵蹈秦郊嬰來稽首革命創
制三章是紀應天順民五星同晷項氏叛援黜我巴
漢西土宅心戰士憤怨乘釁而運席卷三秦割據河

帝王總載中

帝王 卷二十一
山保此懷民股肱蕭曹社稷是經爪牙信布腹心良
平恭行天罰赫赫明明 又文帝述曰太宗穆穆允
恭玄默化民以躬率下以德農不供貢罪不收孥宮
不新館陵不崇墓我德如風民應如草國富刑清登
我漢道 又景帝述曰孝景蒞政諸侯方命剋我七
國王室以定非怠非荒務在農桑著于甲令民用寧
康 又武帝述曰世宗曄曄思弘祖業疇咨熙載髦
俊並作恢我疆宇外博四荒武功旣抗亦迪斯文憲
章六學統一聖真封禪郊祀登秩百神協律改正饗
茲永年 又昭帝述曰孝昭幼冲冢宰推忠燕蓋壽

張實獻實聰罪人斯得邦家和同 又宣帝述曰中
宗明明寅用刑名時舉博納聽斷惟精柔遠能邇輝
耀威靈不顯祖烈尚於有成 又元帝述曰孝元翼
翼高明柔克尊禮故老優游亮直外割禁囿內損御
服離宮不衛山陵不邑奄尹之訾穢我明德 又成
帝述曰孝成惶惶臨朝有光威儀之盛如珪如璋壺
闈恣趙朝政在王炎炎燎火亦允不揚 又平帝述
曰孝平不造新都作宰不伊不周喪我四海

漢傳毅明帝誅曰惟此永平其德不回恢廓鴻績
遐方是懷明明肅肅四國順威赫赫盛漢功德巍巍

躬履聖德以臨萬國仁風弘惠雲布雨集武伏蚩尤
文騰孔墨下制九州上係皇極豐美中世垂華億載
冠堯佩舜踐履五代三雍旣洽帝道繼備七經宣暢
孔業淑著明德慎罰尊上師傳薄刑厚賞惠慈仁恕
明並日月無有偏照譬如北辰與天同曜發號施令
萬國震懼庠序設陳禮樂宣布璇璣所建靡不奄有
貢篚納賦如歸父母正朔永昌冠帶儋耳四方共貫
八極同軌 後漢蘇順和帝誄曰天王徂登率土奄
傷如何昊穹奪我聖皇恩德累代乃作銘章其辭曰
恭惟大行配天建德陶元二化風流萬國立我烝民

宜此儀則厥初生民三五作綱載籍之盛著於虞唐
恭惟大行爰同其光自昔何爲欽明允塞恭惟大行
天覆地載無爲而治冠斯徃代徃代崎嶇諸夏擅命
爰茲發號民樂其政奄有萬國民臣咸秩大孝備矣
闕宮有恤由昔姜嫄祖妣之室本支百世神契惟一
彌留不豫道揚末命勞謙有終實惟其性衣不制新
犀玉遠屏履和而行威稜上古洪澤滂流茂化沾溥
不愆少留民斯何怙歔歔成雲涕泣成雨昊天不弔
喪我慈父 後漢崔瑗和帝誄曰玄景寢曜雲物見
徵馮相考妖遂當帝躬三載四海遏密八音如喪考

妣擗踴號吟大隧既啓乃徂玄宮永背神器升遐皇
穹長夜冥冥曷云其窮 魏曹植武帝誄曰於惟我
王承運之衰神武震發羣雄殄夷拯民于下登帝太
微德美日奭功越彭章九德光備萬國作師寢疾不
興聖體長歸華夏飲淚黎庶含悲神翳功顯身沈名
飛敢揚聖德表之素旗乃作誄曰於穆我王冒稷胤
周賢聖是紹元懿允休先侯佐漢實惟平陽功成績
著德昭二皇民以寧一興詠有章我王承統天姿時
生年在志學謀過老成奮臂舊邦翻身上京表與我
王兵交若神張陳背誓傲帝虐民擁徒百萬虎視朔

濱我王赫怒戎車列陳武卒虓闕如雷如震攬槍北
掃舉不浹辰紹遂奔北河朔是賓振旅京室帝嘉厥
庸乃位丞相總攝三公光受上爵君臨魏邦九錫昭
備大路火龍玄監靈蔡探幽洞微下無僞情姦不容
非敦儉尚古不玩珠玉以身先下民以純樸聖性嚴
毅平修清一唯善是嘉靡踈靡昵怒過雷霆喜踰春
日萬國肅虔望風震慄既總庶政兼覽儒林躬著雅
頌被之瑟琴茫茫四海我王康之微微漢嗣我王匡
之羣桀扇動我王服之喁喁黎庶我王育之光有天
下萬國作君虔奉本朝德美周文以寬克衆每征必

舉四夷賓服功踰聖武翼帝王世神武鷹揚左鉞右
旄威陵伊呂年踰耳順體愉忠肅乾乾庶事氣過方
叔宜並南嶽君國無窮如何不弔禍鍾聖躬棄離臣
子背世長終兆民號咷仰愬上穹既以約終令節不
衰既卽梓宮躬御綴衣璽不存身唯紼是荷明器無
飾陶素是嘉既次西陵幽閨啓路羣臣奉迎我王安
厝窈窈玄宇三光不入潛闥一福尊靈永螫聖上臨
穴哀號靡及羣臣陪臨佇立以泣去此昭昭於彼冥
冥永棄兆民下君百靈千代萬乘曷時復形 魏曹
植文帝誄曰天震地駭崩山嶺霜陽精薄景五緯錯

行哀殊喪考思慕過唐擗踊郊野仰愬穹蒼考諸先
紀尋之哲言生若浮寄德貴長傳朝聞夕逝死志所
存皇雖殮沒天祿永延何以述德表之素旃何以詠
功宣之管絃乃作誄曰元光幽昧道究運遷乾迴曆
數簡聖授賢乃眷大行屬以黎元龍飛踐祚含契上
玄五行定紀改號革年明明赫赫授命自天風偃物
化德以禮宣詳惟聖質岐嶷幼齡研幾六典學不過
庭潛心無內抗志高明才秀藻朗如玉如瑩聽察無
響視覩未形其剛如金其勁如瓊如冰之潔如砥之
平爵功無重戮違無輕心鏡萬機鑒照下情宅土之

帝三 卷三十一
中率民以漸道義是圖弗營厥險六合通同齊契共
檢導下以純民由樸儉緇冕崇麗衡統惟新尊肅禮
容瞻之若神方牧妙舉欽於恤民虎將荷節鎮彼四
隣朱旗所勦九壤披震疇克不若孰敢不臣懸旌海
表萬里無塵回回凱風祁祁甘雨稼惟歲豐登我稷
黍家佩惠尹尹蒙慈父在位七載九功仍舉將承太
和繼跡三五宜作物師長爲神主壽終金石等筭東
父如何奄忽摧身后土俾我熒熒靡瞻靡顧嗟嗟皇
穹胡寧忍予明鑒吉凶體達存亡深垂典制申之嗣
皇聖上虔奉是順是將乃啓玄宇基于首陽擬跡穀

林追堯纂唐合山同阪不樹不疆塗車芻靈珠玉靡
藏百神警侍賓于幽堂於是侯大隧之致功陳元辰
之淑楨潛華體於梓宮憑正殿於居靈悼晏駕之旣
俟感容車之速征浮飛魂於輕霄就黃墟以藏形背
三光之昭晰歸窀穸之冥冥嗟一往之不返痛悶闕
之長局 晉陸機吳大帝誄曰我皇明明固天寔生
體和二合以察三精濯暉育慶懷祥載榮率性而和
因心則靈厥靈伊何克聖克仁茂對四象克配乾坤
齊明日月考祥鬼神誕自幼冲獻哲宿照甄化無形
探景絕曜巍巍聖姿文武旣俊有覺德徽兆民欣順

將熙景命經營九圍登跡岱宗班瑞舊圻上玄匪惠
早零聖暉神廬既考史臣獻貞龍輜啓殞霄載紫庭
辰旒飛藻凶旗舉銘崇華熠爍翠蓋繁纓千乘結駟
萬騎重營簫鼓振響和鑾流聲動軫闐闐永背承明
顯步萬官幽驅百靈隨化太素卽宮杳冥億兆同慕
泣血如零 晉潘岳世祖武皇帝誄曰粵若稽古帝
皇誕受休命作我晉室赫赫文皇配天並日大行龍
飛創制改物沈恩汪濊流澤洋溢上齊七政下綏萬
邦四門穆穆五典克從惟清緝熙於變時雍愛盡事
親教加百姓于喪過哀在祭餘敬后蠶冕服躬藉柔

盛六代畢奏九功咸詠行敦醇樸思貫玄妙蒞政端
位臨朝光曜胄子入學辟雍宗禮國老恂恂貴遊濟
濟莫孝匪子莫悌匪弟化自外明訓法以禮獮彼吳
楚稱亂三代世歷五僞年幾百載邊垂虔劉王化阻
閔羽檄星馳鉦鼓日戒帝御羣師奉辭奮旅腹心庭
爭爪牙疑沮天監獨照聖策乃舉朝服濟江止戈曜
武野無交兵役不淹月僭號歸命稽顙晉闕邪界蠻
流傍納百越表閭旌善德音爰發虞人獻箴周書垂
誥酒懼其彛獸戒其冒于我大行縱心所好動不踰
矩性與道奧厭厭酣飲樂不辨顏桓桓振旅田無遊

盤我德如風民應如蘭靡不夙夜無敢晏安務農望
歲時或不稔小心翼翼恤民以甚御坐不怡撤膳賑
廩西流垂精南金抑施永言孝思天經地義問誰贊
事英彥髦士問誰翼侍博物君子潛明神鑒從衆屈
已道濟羣生爲而不恃先天弗違後天降時萬物熙
熙懷而慕思顒顒縉紳不謀同辭巖巖岱宗想望翠
旗恭惟大行功成不居議寢封禪心栖冲虛策告不
足太平有餘七十二君方之蔑如思樂天德等壽嵩
華如何寢疾背世登遐遷幸梓宮孤我邦家龜筮旣
襲吉日惟良永指太極寧神峻陽羣后擗躅長訣輓

輓聖靈斯顧豈伊不傷家無遠邇邦靡小大四海供
職同軌畢會茫茫原野亭亭素蓋編輅解駕白虎弭
旒龍輻卽定玄闈載肩如天斯崩如地斯傾哀哀庶
寮烝烝自愍彼蒼者天胡寧斯忍聖君不返我獨旋
軫 宋謝靈運武帝誄曰九有同悲四海等哀矧伊
下臣思戀徘徊敢遵前典式述聖徽乃作誄曰舜潛
歷巖高悔泗渚龍德而隱風積乃舉皇之遁世屯難
方阻眷此區寰閔爾淪胥太乙之季權威攜薄隆安
之初主相蒙弱嶽牧糾虔朝廷紛錯妖橫乘隙蛟噴
鯨躍旣擾輿區遂斥帝屢亂離斯瘼不後不先寔賴

明哲授手康旃紀度廻薄餘分成閤舊晉中微僞楚
藉釁躡彼潛機整此英陳推亡必朽固存斯振盧循
負險肆慝遐嶺殄我江豫迫我臺省民旣搖蕩國將
遷鼎乘騶歸轅式固皇境弘危濟險弭難釋殆虎騎
驚隰舟師漲海傾穴尋窠窮幽測昧昔去洛汭息肩
江止世更十君年踰百祀國絕興復家成桑梓荒默
莫恤頽國誰耻夏典載禹九道是行商詔述湯兼攻
是并勤彼周流協此經營仗鉞伐鼓赫赫明明乃救
衆師竟執戎昭誨以三略惠以六韜雲撤周京席卷
秦郊復禮前塋雪愧舊朝旣清西關將旋東道中憇

徐豫兼應燕趙業盛曩代惠侔大造澤及四海功格
八表悠悠聲教綿綿川陸北獻旣表南貢金竹鬚首
冠弁穿胸斂服寒穴欣日巢栖玩屋匪惟遐譚靈物
偕就孰是人事自天所祐甘露芝草祥雲瑞宿嘉禾
連木素鳥皓獸昔之所感謳頌同音今之所應幽顯
一心宋克虞德晉猶唐欽曰總八絃于茲三齡四維
開張九流昭明敦儉務素欽賢愛萌制規作訓闡校
修經禮樂已甄雲雨未弘將陟井陘薄掃白登北朔
渴望飛旌衡軻東岱靈遲玉牒金滕天地不仁蒼生
寡福已荷一遇棄我何速梁顛木頽甘殞以贖同軌

畢至率土咸哀殊方均服纒纒素線灑淚成雨響叶
如雷史臣考卜高山開基貞龜無遠遷靈有期嗣皇
擗標羣后崩悲孰云不戚痛百在茲惟祖之夕流火
始變秋月未永飛漏急箭鳴簫哀噉金觴虛奠列駕
長隧發輦華殿華殿旣謝長隧是幸雙蓋躊躇六閑
引領攀援容貌眷戀俄頃哀哀百僚長辭含鯁奉教
百朝執鞭王始從履五牧年歷十祀天光下濟謬蒙
眷齒愧微刀筆頗預遊止垂幕侍講接筵餐理脩曙
朗夕登臺泛沼匪月匪日無晏無早如何一旦緬邈
穹昊徽容木遠聖靈超然收淚卽路含戚何言風霜
蕭瑟山海蒼茫地苦情矜節速心傷孰是幽哀實戀
我皇情思如環萱蘇豈忘

哀策魏文帝爲武帝策文曰痛神曜之幽潛哀鼎俎
之虛置舒皇德而詠思遂膈臆以莅事矧乃小子夙
遭不造煢煢在疚嗚呼皇考產我曷晚棄我曷早羣
臣子輔奪我哀願猥抑奔墓俯就權變卜葬旣從大
隧旣通漫漫長夜窈窈玄宮有晦無明曷有所窮鹵
簿旣整三官駢羅前驅建旗方相執戈棄此官庭陟
彼山阿晉張華武帝哀策文曰感大饗之無虧哀
罇俎之虛設叩龍輶以長叫痛靈暉之潛逝其辭曰

欽惟皇考體道之真德侔乾坤齊曜三辰應期登禪
協于天人上虔郊祀下惠兆民憲章唐虞允得其津
搜揚側陋故老是賓百揆時序盛業日新恩從雲翔
威猶霆震江海靜波岷岳無塵四夷率服莫不來臣
肅慎奉貢越裳効珍化此弊俗歸之至淳昔在上聖
咸享百年哀哀皇考用不是臻遘厲彌侵景命殞顛
舍此昭晰卽彼幽玄仰瞻靡怙廓若無天終制尚儉
率由典度華幕弗陳噐必陶素不封不樹所在惟固
貽法來世是則是慕大隧旣啓吉日將征鐘鼓雷震
白虎抗旌龍螭驤首良駟悲鳴倡者振鐸挽夫齊聲

背此崇殿將適下庭玄宮窈窕脩夜冥冥光燈永戢
幽闈長扃仰訴皇穹零淚屏營云誰能忍寄之我情
結心墳隴永憑聖靈 晉郭璞元皇帝哀策文曰永
惟殿宇之廓寂悲葬奠之莫歆感鸞輅之晏駕哀衮
裘之委衿痛聖躬之遐往長淪景於太陰乃作策曰
王之不極百六作艱鴟集瓊林鯨躍神淵懷愍失據
海覆岳顛蠢蠢六合罔不倒懸靈慶有底見龍在田
誰其極哉我后先天大人承運重明繼作撫征淮海
駿命再廓仁風旁靡神化潛鑠處冲思挹居簡行約
聖敬日邁玄心逾漠用物與能總攬羣略林無滯才

山無遺錯恩靡不懷化靡不被茫茫海域歎塞慕義
萬里同塵罔匪王綵熙熙遺黎莫知其寄括終宇宙
混同天地曰功永年曰德慶隆柰何氛厲奄集聖躬
大業未恢皇齡未中天憐其景崑頽其崇煢煢小子
藐藐孤冲靡天何戴靡地何憑恍惚極慕若存若終
蔑焉無聞廓焉長寂聆音靡晞瞻顏失覲窮號曷訴
叩心誰告何悲之哀何痛之酷嗚呼我皇逢天之戚
嗚呼哀哉眇然升遐卽安玄室煌煌火龍赫赫朱鞞
終焉永潛曷其有出明訓長絕小子何述望阜增歎
臨崩慟慟哀兼陟方痛過過密靈爽安之反真復質

永合元漠終始得一

晉成帝哀策文

闕撰人姓名

曰宸

極寥廓聖靈遐之哀備物之虛在痛永往之無期乃
命史官述德寄辭其辭曰五德代興素靈啓曜離光
疊耀三辰重照明我皇含貞挺妙玄秀夙達履德
罔違鳳棲遐邈神宇凝夷文明外潤仁簡內綏舉無
遺中鑒無幽微運隆汾陽道侔垂拱靜恭清穆冥功
日用亶亶神軌固天攸縱爰在陽九皇綱中替姦豎
肆逆牢羅失衛升降艱難協應神契靈祚旣保顯揚
天命霏霏朝晞兩儀開鏡訓詔阿衡虛已納正九功
潛流七德將表方振宏羅稜威電掃芟蕩神衢一我

王道昊天不弔降茲大悔天傾其儀地覆其載大業
未究神爽遷背哀貫三靈痛流萬代爰初不豫大漸
在躬啓手歸全神氣夷冲凝哉達識體正履終衮龍
旣襲玉容斯幽登醪虛設觴爵靡酬墳牘莫啓聖跡
誰修冥冥我皇神馬何遊撫膺遐叫迸涕交流三筮
告期將歸陵墟陞羽翼庭納龍輿玉輪動運錫鸞
鳴衢錫旆徘徊六驥踟躕輕雲蔭軌流風翼車哀哀
同軌唯唯輓夫長號永慕泣涕漣洳大塊獨運終歸
其始我后永往寧神千祀悠悠上天烝烝惟已眇然
靡憑廓焉無恃目範令儀徽音在耳 晉康帝哀策

文

闕撰人
姓名

曰感廣厦之空寂悲俎奠之虛陳痛皇神

之邈遠哀靈景之長泯仰瞻宸極俯憑鸞軒五情摧
裂號慟煩寃遂命國史述德銘勲事以言顯功以名
存其辭曰招拒降靈篤生我皇岐嶷妙哲幼有珪璋
含貞發曜蘭風載芳厥初肇建宗國是胤祗承師友
執心淑慎徽猷愷悌金質玉潤固天所啓應茲靈運
入繼皇祚龍騰鳳迅因假任物惟精委順穆穆我皇
風流疑廣聰鑒遐照思心內朗應變無方從善如響
矩儀可慮法物可象覆燾群生靡物不養如何一日
神遊靈爽仰攀擗踴觸物感想卜吉有期將卽玄冥

帝王

卷二十一

十三

帝王總

太常既建千乘列庭皓皓輿服翩翩素旌笳蕭寥唳
輓夫齊聲六驥躊躇蕭蕭悲鳴是用增哀雨泣沾纓
痛貫五内哀切三情道隆名貴德享彌光灼灼皇猷
終焉允臧垂美兆祀芳風休揚 晉穆帝哀策文
闕撰 人姓 曰欽明文思允恭克讓忽若布衣忘其衿尚體
有示無德充神王冕旋兩楹委政元輔内倚公旦外
仗尚父郁哉惟文赫斯惟武西廓岷河北清伊渚園
陵聿修舊京式叙方振長彗風掃天宇休牛歸馬卷
旗卧鼓俾我烝民擊壤容與昊天不弔奄背率土哀
同遏密痛方割鉅日月不居神道之幽三辰吉良五

謀同休祖載華庭晏駕崇丘俯執饋奠仰攀龍輶
歲黼斐飄飄素旌感想平昔人懷崩抽號聲如震灑
涕成流 晉簡文帝哀策文
闕撰人姓名 曰同軌畢至内
外成列素旗宿縣輶輶首轍執祖行於前殿奉靈輿
而遷逝悲神宇之長違痛聖儀之幽翳攀龍輶以號
慕撫素膺以泣血爰命史臣叙述聖德揚徽音於飛
旌寫哀心于翰墨乃作策曰淳曜發暉皇曆攸膺聖
祖啓運哲王遐承烝哉元后光我中興天基徙構朝
陽再升皇矣聖考合一履中道心玄玄文明内融湛
湛神儀穆穆靈風望之凝秀卽之深冲爰在初齡至

性自然水鏡一世堂室重玄悄悄素庭翳若丘園遂
阿王室婉跡經綸時有汗隆道無屈伸如彼平流泯
矣其津大過之時皇德不競天人革心謳謠徙詠時
惟伊霍輔運以政欽若昊天祇此明命龍飛九五饗
茲萬國居宗舉契允恭玄默綢繆哲輔虛已仗德大
明方曜離暉翳朗玄化誰陶蒼生曷仰四運忽其遙
邁日月飄以飛沈將寧神於玄宇遷玉輅於中林背
華殿之昭晰卽幽隧之重深奉神櫬以永訣邈終天
而莫尋神恍惚其若寄泣橫墜以流襟 晉王珣孝
武帝哀策文曰同軌畢至百司胥亞法物夕陳輶輶

夙駕親執饋奠長號永夜懼鼓刻之端盡哀良辰之
莫借悲宮宇之寥廓痛聖儀之幽化夫至德無名固
理絕稱謂然祝史陳辭亦臣子所貴寄窮情於翰墨
庶遺塵之髮髯其辭曰惟皇作極五德迭胤康實復
夏武亦隆晉疊疊太宗希夷其韻鏡之者玄撫之者
順於穆皇考嗣徽絕軌前聖後哲契合一揆心去其
伐行遺其美廢華任誠捨筌存肯惟深通志羣方咸
秩惟幾成務能事斯畢未若我皇至則不疾恢恢天
網䟽而莫失居有以虛宰多以少簡則可從易則不
擾信及豚魚澤被億兆湛然司契坐一八表園陵旣

衛威靈赫赫子來旣構寢廟奕奕武曰止戈戎不極
從文教聿修有耻且格跡有遠邇感無高深道之所
被改色革音皓獸馴苑素羽棲林殊柯連理異蒂同
根方融玄液陶鑄斯民雲韶候奏比屋思淳積祐莫
應天罰奄臻太山頽構洪瀆竭津何殃之甚何酷之
殷自惟閔凶二氣代變霜繁廣除風迴高殿帷幙空
張肴俎虛薦極聽無聞詳視罔見人神道殊吉凶有
禮龜策參謀埏隧告啓史臣考古警者在陞攀援忪
忪惟兄及弟龍輿肅以引邁前驪紛以抗旒城闕儼
以整列馳道亘以通修感平昔之所幸豈斯路之復

由輓哀唱以翼衡駟悲鳴而顧輶違華宇之晰晰卽
永夜之悠悠奉靈輓而長訣緬終天而莫收詎穹蒼
以叫踊洞五內其若抽儻性命之可贖甘人百於山
丘茫茫大運靡始不終哲王遺世貴在道融昭哉我
皇萬代流風良史式述德音永隆 宋謝莊孝武帝
哀策文曰應門洞望馳道南除敢塗已撤鬱鬯將虛
哀子嗣皇帝擗標池綽周遑旌軫攀七緯之崩淪慟
三靈之徂盡百神慕而行雲沈萬國哀而素霜竇衣
冠緬邈弓劍不追敢緝謳頌髣髴希夷其辭曰樞電
皇根月瑤國緒胤裔丹陵蟬聯華渚二后在天大行

纂武克睿克聖重規襲矩昭昭命式明明玉溫望雲
其遠就日其尊雨露湛冬暖春暄聲芳納麓道昭
賓門上德無稱至功不器悵悵四始優游六位綴響
蘭深緝言瓊秘悠哉梁踐眇焉汾肆敬業開寓離經
作翰鴻起荆河鸞遊楚漢泗濱霑明江區承負陝左
清郊棠陰虛館地維不紐乾剛弛機義庭薄蝕紫路
流飛泣血派浹碩瞻川沂孝貫樞極義震寰圍誓鉞
皇郊詔師攸甸七景締華五雲卷煽雪怨囹邑掃耻
瀛縣啓聖宸蓋集寶龍見王室多故國步方蹇淮濟
裂冠江荆毀冕東楚亂常西華泊興動筭揮圖爰搃
爰翦浹宙斯澄綿區咸鏡脩風曉逸德星夕映溽露
飛甘舒雲結慶禎被動植信泊翔泳軼禮克宣墜章
必構方堂饗極圓流肆胄南聳郊宮北清靈囿瑤軒
春藉翠華冬狩經緯窮文克定盡武鄙上呈祥介丘
載佇在盈念冗成功弗處榮鏡中世烏奕前古睿業
初遠鴻化方亭丹雲承日素景騰星玉几去襲綴衣
在庭辭重陽之昭昭降大夜之冥冥氣質炎涼史詔
龜筮文物空嚴鑿和虛衛動蜃輅之逶迤顧壁羽之
容裔出國門分天地向幽途異身世龍旌鬱而青槐
遠驚葭亂而白楊翳觀初霜之變條聽秋風之下幣

橋山緝雲殺林虧日輦道結寒松庭盡密芝蓋迫於
上驤眷轡萬寓肅其北軟靈阿聞其深隘南維有時
傾離光不長鏡騰英聲於茂實方流華於舞詠齊
王儉高帝哀策文曰降階執禮泣血纏心感客臺之
罷御哀恭館之不臨仰神儀而邈絕視區物而悽陰
俾茲良史敬修舊則敢圖鴻規式揚至德其辭曰靈
源遙裔肇惟商在聖躬寧夏賢識歸周我皇踵武超
冠前猷英風允迪德音孔修月往敷仁日精表孝則
地均和體天合照外弘三至內隆七教水祀將傾乾
維晦象韋弁長襲鼓磬屬響聲化已淪政刑遂往國

圖靡緝民規載爽康世以德揆亂資武威以雷霆潤
以風雨六術允昭四義克舉自東徂北遐方卽叙功
被河濟化隆江漢帝謨仰式王維佇幹改步藩屏來
登翼贊綢繆總章因循陽館昔在保衡君違斯正爰
茲博陸亦鑒靈命放昏以忠登明資敬義煥金石功
昭舞詠蠢爾荆漢悖亂人經謀連樞禁兵接神壻禦
奸以德禦宄以刑獻捷宗寢飲至王庭政教雲行徽
猷天造山鑑紫璇苑茂朱草玉檢騰暉金繩薦寶天
鏡旣穆維旣肅遐邇壹體表裏禔福乃眷斯民昧
旦扞軸興文偃武績禹舊服所尚惟簡所保惟賢居

尊彌約無善不延膠庠載緝風軌克宣上洞清儀下
達玄泉聽覽閑日應物餘景怡慮以文棲心以靜鴻
章晨映徽言夕永迹庇區服情深箕穎萬寓餐和百
神受職梁甫欣儀云亭望式輔德伊何奄指民極嵩
岳長傾宸暉斯昊機照惟寂達鑿靡傷慎終敬始知
微知彰立言垂範玉潤金相瞻仰遺式哀結流霜旋
玉軼之皦鏡動雲旗之逶迤振哀笳於八極響清蹕
於咸池顧應掖而稍遠視機衡而長離風遲遲而懷
暮日憺憺其若垂感衣冠於喬岳追弓劍之在斯悼
丁年之薄祐訴窮心於兩儀 梁沈約齊明帝哀策

文曰龍葢旣撤備物已陳殯宮無夜夕燎終晨號環
輶幄攀標應路容衛弗改軒檻如故望東川而不追
仰昊天而自訴列聖同軌謚法樹聲爰詔掌牘式播
遺英其辭曰五曜在天遞作民主赫矣帝高蒸哉嗣
武多難固業殷憂啓聖時惟我皇功符受命爰始濡
足坐運機深鵬逝風舉龍動雲陰之郢南沂卽豫西
臨體茲大德懷此小心賓于四門四門穆穆納于百
揆百揆肅肅德浸董荼仁被比屋何遠何邇無思不
服嗣君喪道不式典謨神器業業事等瞻烏民懷與
主后来其蘇皇天眷命授以籙圖臨朝凝睟昧且不

顯斟酌前王擇其令典不言斯應不行斯踐路臺靡
營離宮弗宴眷言膠塾弘啓上庠軌儀四代祖述三
王德暉內動英華外揚禮行罇俎義及幽荒仰庶天
德降年永久北極齊光南山獻壽滄溟奄竭嵩岱皆
朽沴非昊穹惟余之咎攀龍詎幾大隧玄玄厭世崇
陛卽宮下泉殞階已遽素幕高褰端闈洞啓蜃紉徐
前背朱闕以南轉乘翠龍而東度經原野之荒涼屬
西成之云暮伐金鼓以清道揚悲笳而啓路極厚地
而不追終蒼天而永慕蒼梧晦遠春綴不泯紀事寂
寞龜書可循哲王違世克播遺塵猗歟萬古暉光日

新 北齊邢子才文宣帝哀策文曰皇路啓扉輶載
弛殞八校案部六卿且引攀屨輅而雨泣仰穹蒼而
撫心悲風發而地駭愁雲興而景沈哲王垂範有訓
有則式奉話言光敷令德其辭曰四象更運九天代
名通三以王得一爲貞是應玄德實啓蒼精風后之
陳師尚之兵三奇六合七變五成授戈推轂稟律襲
行野無完陳邑少堅城經營四海劬勞百姓芝蓋夕
臨羽旄晨暎地不掩瑞天不愛寶旣丹其雀又朱其
草莫黑已素莫赤自皓百獸斯蹈五靈載擾甘露灑
灑青龍矯矯武功已暢文教未窮方偃烽埃銷戟藏

弓齊光日月比祚華嵩而氛祲日下星闇虛中奄捐
朝市長葉華戎道宣末命義闡餘風六綽已散九旗
方卷見容衛之虛歸知平生之日遠同乘雲而永逝
異騎龍之更反清笳奏兮野風急金鼓震兮日光晚
千官悲而雨注萬國哀而露泫萬事同盡百慮俱收
劔舄永去衣冠自遊音儀已謝神教空留知英聲與
至德當無絕兮千秋 陳沈炯武帝哀策文曰望三
靈而標目踏九地而崩心哭仍几之將撤慟祖塋之
虛斟黃屋禔而白日掩紫極涵而浮雲陰其辭曰悠
悠媯水鬱鬱姚墟惟帝之系在唐作虞正卿之後握

此靈符雕雲布族祥星結樞負茲大鏡未拾遺珠爰
初發跡斬虵鞠旅大定番禺載戡海渚承蒙而運席
卷中流王室如燬乃合諸侯負鐵誓衆釋位同謀俱
登涿鹿實斷蚩尤道濟一匡功歸四履爰總百官訓
于天子儻來有運事非獲已翠龜負字赤雀銜書謳
謠適夏禮樂遷虞負辰正位升壇受圖二儀協序五
緯同符門歌麟趾室詠騶虞奉常定日太卜蠲時升
中備物方告雍熙天其玉露地秀金芝休禎未答靈
貺徒欺吏求穆卜詔絕良鑿義躔失御天街褫蹕夏
采升榮宮車晏出洞閨移凶充庭罷吉閑宵宵之窮

帝王 卷二十二
燈去昭昭之遊日歸大暮之不暘降幽宮而長畢巫
咸筮告容成戒期文衛如在葆鐸相悲去畢陌而東
顧望橋山而路遲臣攀龍而尚在魂過沛而何之侍
低昂之靈纛奉寂寂之空帷銅雀沒於脩松平陵隱
於深柏節鼓之哀音燎燿火於通夕薤露落而暮
日寒玄霜凝而壟草白銘功德於旂常被徽音於鍾
石迴天儀於清廟祔祖考而來格播茂實與英聲鬱
氛氳於宗祏 陳徐陵文帝哀策文曰容車曉駕嗟
殿晨張旌帷具列綵翮成行擗蜃輅於丹陛攀龍帷
於紫庭趨過窮於屏闈拜慟感於明靈東京飛其

露北陸賈其祥星乃詔雲臺之史稽採咸池之曲
大雅於鳴金同藏書於羣玉其辭曰若水傳帝薰風
御民重光所集世載千陳赫矣高祖悠哉上旻蟬聯
寶胄暉煥郊禋我皇誕聖膺此家慶道主衢樽神凝
懸鏡洛書天表河紀靈命納揆馳芳賓門流詠稽陰
克伐震野勤王亳道增構幽風會昌言瞻少昊實仗
高陽駕彼軫轡清宮未央歡覃兆庶德汨遐荒穆齊
高寢上膳長樂蕭蕭承顏哀哀薦酌悼園恭儉章陵
謙約大寶崇名無聞改作纂武升歷遺愛寔繁三湘
九派彌氣雲昏力折天柱才傾地門其泉夜照細柳

朝屯谷魅山鬼橫流塞源赫赫英謨赳赳雄斷通行
天討無遺神筭鬱掃江淮長驅巴漢九夷白越雷隨
風渙北俘昆耶西戡伊軒荷負皇極劬勞庶機勤民
聽政盱食宵衣服貴綿皂風移闌闌唐山罷奏濮水
韜徽訪採狂狷搜敷仄微世感中孚民維大畜外戶
無閉高垣奚築降情儒雅凝懷庠塾御庶爲歡臨雍
彌肅禮兼三代樂備九成天資武德地照文明墨履
斯在幪巾自清連珠合璧曜爽流精獸舞時豫禽歌
頌平帝載維遠王靈維大候雨占風荒中海外憬彼
鞮譯咸承冠帶是曰君臨斯爲交泰白環已賚玄珪

克慎東河佇楫北狄思征鉞斧將戒璫珩未鳴星滂
去楚日沴悲荆億兆何豐穹昊遽傾大禹胼胝重華
脍腊仰惟勞務同斯違懌發夢無徵照祈奚益聽茂
陵之鐘鼓抱橋陽之劔烏詎髮髯於宸儀終纏綿於
號擗三占以吉四海同奔列鼎天半崩號帝闔千門
啓於閭闔萬乘警於靈輶槐風悲於輦道松雨思於
郊原鑿旂動而虛蹕宿衛靜而空尊畢陌平夷流山
蟠固紀無遷市唐有通樹經白社之脩塗廻青門之
廣路思沛邑以東臨懷周京以西顧機神不測性道
難稱充窮靡寄孺慕奚憑惟封云之與禪蕭遺玉牒

帝三 卷三十二 三三
之與金繩揚英聲而永久其日月而俱升 陳江總
陳宣帝哀策文曰望蜃紵而攀標拜龍敢而慟絕變
五統而妻京廻三辰而慘切感川岳而地維傾號穹
蒼而天柱折千秋茂德萬世鴻名爰詔掌禮式序英
聲其辭曰媯水樞宿姚墟大虹謳歌承曆揖讓受終
重規帝緒踵武王風名山紀跡清廟傳功我后丕承
思弘祖業蒞政恭已臨朝凝默煥爛九功歲蕤上德
憲章昭著威靈允塞爰茲發迹天步艱難連華滕衛
比譽應韓羽儀威右軒冕朝端祈膺當璧繇顯大橫
延喜授玉告善飛旌神器有奉性道無名詩頌唐年

樂舞姬日仁聲汪濊武義洋溢理訟總街凝情衢室
巡望如禮幽祇咸秩疆垂叛援關微虔劉洽兵丹浦
獲醜青丘屠釣且拔管庫方搜如龍駕鼓獻雉焚裘
天必呈祥地寧愛寶神禽奇獸嘉穀靈草屈軼抽階
飛黃伏阜綺雲舒慶珠星照老廣敷丘素弘啓膠庠
書林吐馥文囿含鏘南洽侯衛北暢遐荒殷羅自解
周囿無傷金英掩色玉牀弗豫天駟摧鑣王良失御
鑄鼎奚益綴衣何處漫漫幽夜冥冥上仙長違拜日
天意祈年寧神卜兆晏駕廻天銅麟感泣銀海埋田
出德陽之廣殿動繁笳之哀嘽渡洛水之浮橋望偃

師之近縣背紫陌而未遠隱黃山而不見鐸啓挽而
依依馬嘶風而戀戀平原欲晦落照將垂鳳蓋飄而
水暗鸞躡聳而山危曳虵旗之舒卷間翠野之參差
鳥哀哀而驚曙松瑟瑟而吟枝異故鄉之絲竹非舊
宅之墳簾掃秋葉而無盡薦春櫻而願知北印已謝
西陵何有遠宿蒼梧便乖仁壽聲合韶濩道宣戶牖
共瀛海而恒流並嵩華而莫朽

謚策齊謝朓明皇帝謚策文曰仰惟早棄萬邦聖烈
方遠式遵帝世俾曾鴻猷咸以爲無名以化則言繁
莫宣其道有來斯應則影響庶圖其功所以永言觀

命寄心宗極光昭令德允樹風聲伏惟合信四時齊
光日月創保大於登庸通機神於受命因時以惕藉
九萬而輕舉天保既定運四海而高臨及開物成務
重維國紐風行草偃化往如神左賢右戚內樂外禮
輯五材以教民申三驅而在宥用能盛德殷薦美善
斯畢皇矣之業旣孚蒸哉之道咸備景化方遠厭世
在天龜筮告期遠日無改仰則前王俯詢百辟累德
彌睿允極鴻名

碑後魏温子昇舜廟碑曰懷山不已龍門未闢大道
御世天下爲公感夢長人明歎从陋釐降二女結友

九男執耜歷山耕夫所以讓畔施畧雷澤漁父於是
讓川亦既登庸以之納錄九官咸事百揆時叙有大
功於當世集歷數而在躬受文祖之命致昭華之玉
班五瑞於羣后禋六宗於上玄舞干戚而遠夷賓棄
金璧而幽靈應青雲浮洛榮光塞河符瑞必臻休祥
咸萃以君人之大德爲帝王之稱首陟方之駕遂往
蒼梧之窆不歸爰自先民實存舊廟旣緝葺房遂鎮
瑶席龍駕帝服蓋依稀於慕舜交鼓絙瑟實髮髯於
聞韶其辭曰虹氣降靈姚墟誕聖樹陰未陟帝圖已
定乃賓四門以齊七政天眷功高民歸德盛治旣蕩

蕩化亦巍巍南風在詠西環有歸嶷山永逝湘水長
違靈宮肅肅神館微微 後漢班固高祖泗水亭碑
曰皇皇炎漢兆自沛豐乾降著符精感赤龍承魁流
裔襲唐末風寸木尺土無埃斯亭建號宣基維以沛
公揚威斬蛇金精摧傷涉關凌灞受爵漢中勒兵陳
東剗禽三秦陳張畫策蕭勃翼終出爵褒賢列土封
功炎火之德彌光以明源清流潔本盛末弘序將八
十贊述股肱休勲顯祚永永無疆於皇舊亭留嗣是
承天之福祐萬年是興 後漢蔡邕光武濟陽宮碑
曰王室中微哀平短祚姦臣王莽偷有神器十有八

年罪盈惡熟天人致誅帝乃龍見白水淵躍昆潢破
前隊之衆殄二公之師收兵略地經營河朔於是羣
公諸將據河洛之文協符瑞之徵僉曰歷數在帝踐
祚允宜乃以建武元年六月卽位于鄗縣之陽五成
之陌祀漢配天罔失舊物享國三十有三年方內又
安蠻夷率服巡狩泰山禪梁父皇代之遐迹帝者之
上儀罔不畢舉道德餘慶延於無窮先民有言曰樂
樂其所自生而禮不忘其本是以虞稱媯汭姬美周
原皇天乃眷神宮實始于此厥路藐哉所謂神麗顯
融越不可尚小臣河尹瑋來在濟陽願見神宮追惟
桑梓褒述之義用敢作頌 其辭曰赫赫炎天爰曜其
暉篤生聖皇貳漢之微稽度度則誕育靈姿黃髮作
慝篡握天機帝赫斯怒爰整其師應期潛見扶陽而
飛禍亂克定羣兇殄夷匡復帝載萬國以綏巡于四
岳展義省方登封降禪升于中皇爰茲初基天命孔
彰子子孫孫保之無疆

唐類函卷三十三

明東吳俞安期彙纂
明邵陽車大任校訂

帝王部三

帝王總載下

○帝王總載下

論 文 表 章 議
策 令 牋 序 啓

論漢賈誼過秦論曰秦孝公據崤函之固擁雍州之地君臣固守以窺周室有席卷天下包舉宇內囊括四海之意并吞八荒之心當是時也商君佐之內立法度務耕織修守戰之具外連衡而關諸侯諸侯恐懼會盟而謀弱秦不愛珍器重寶肥饒之地以致天

下之士合縱締交相與爲一當此之時齊有孟嘗趙
有平原楚有春申魏有信陵此四君者皆明智而忠
信寬厚而愛人尊賢重士約縱離橫兼韓魏燕楚宋
衛中山之衆嘗以什倍之地百萬之師仰關而攻秦
秦人開關延敵九國之師遁逃而不敢進秦無亡矢
遺鏃之費天下諸侯已困矣及至秦始皇奮六世之
餘烈振長策而御宇內吞二周而亡諸侯履至尊而
制六合執敲朴以鞭笞天下威振四海南取百越之
地以爲桂林象郡百越之君俛首係頸委命下吏乃
使蒙恬北築長城而守藩籬却匈奴七百餘里胡人
不敢南下而牧馬士不敢彎弓而報怨然後踐華爲
城因河爲池據億丈之城臨不測之谿以爲固良將
勁弩守要害之處信臣精卒陳利兵而誰何天下已
定始皇自以爲關中之固金城千里子孫帝王萬世
之業也始皇旣沒餘威振于殊俗然而陳涉甕牖繩
樞之子疇隸之人而遷徙之徒也材能不及中人率
罷散之卒將數百之衆轉而攻秦山東蒙俊蜂起而
亡秦族矣而成敗異變功業相反試使山東之國與
陳涉度長絜大比權量力則不可同年而語矣然秦
以區區之地致萬乘之權招八州而朝同列百有餘

年矣然後以六合爲家崤函爲宮一夫作難而七廟
隳身死人手爲天下笑者何也仁義不施而攻守之
勢異也 後漢孔融周武王漢高祖論曰周武王從
后稷以來至其身相承積五十世俱有魚鳥之瑞至
高祖一身修德瑞遽有四呂公望形而薦女呂后見
雲知其處白蛇分神母哭西入關五星聚又武王伐
紂斬而刺之高祖入秦赦子嬰而遺之是寬裕又不
如高祖也 魏王粲難鍾荀太平論曰聖莫盛於堯
而洪水方割丹朱淫虐四族凶佞矣帝舜因之而三
苗畔戾矣禹又因而防風爲戮矣此三聖古之所大
稱也繼踵相承且二百年而刑罰未嘗一世而乏也
然則此三聖能平三聖能平則何世能致之乎孔子
稱曰唯上智與下愚不移不移者丹朱四凶三苗之
謂也當紂之世殷罔不小大好草竊姦宄周公遷殷
頑民于洛邑其下愚之人必有之矣周公之於三聖
不能踰也三聖有所不化矣有所不移矣周公之不
能化殷之頑民所可知也苟不可移必或犯罪罪而
弗刑是失所也犯而刑之刑不可錯矣孟軻有言盡
信書不如無書有大而言之者刑錯之屬也豈億兆
之民歷數十年而無一人犯罪一物失所哉謂之無

者盡信書之謂也。魏曹劌六代論曰：昔者夏殷周歷世數十而秦二世而亡，何則？三代之君與天下共其民，故天下同其憂；秦王獨制其民，故傾危而莫救。先王獨知治之不能久也，故與人共治之；知獨守之不能固也，故與人共守之。兼親疎而兩用，參同異而並進，是以輕重足以相鎮，親疎足以相衛，兼并路塞，逆節不生，及其衰也，桓文率禮，苞茅不貢，齊師伐楚，宋不城，周晉戮其宰，王綱弛而復張，諸侯傲而復肅。二霸之後，浸以陵遲，吳楚憑江，負固方城，雖心希九鼎而畏，迫宗姬，姦情散於胸懷，逆謀消於唇吻，斯豈非信重親戚，任用賢能，枝葉碩茂，本根賴之。至於王赧降為庶人，猶枝幹相持，得居虛位，海內無主，四十餘年，秦據勢勝之地，騁譎詐之術，征伐關東，蠶食九國，至於始皇，乃定天位，曠日若彼，用力若此，非深根固蒂不拔之道乎？漢祖奮三尺之劍，騁烏合之衆，五年之中，而成帝業，自開闢已來，其興功立勲，未有若漢之易者也。夫伐深根者難為功，摧枯朽者易為力，理勢然也。漢鑒秦之失，封植子弟及諸呂，擅權圖危，劉氏而天下所以不傾動，百姓所以不易心者，徒以東牟朱虛受命於內，齊代吳楚作衛於外，向使高祖

踵亡秦之法忽先王之制則天下再傳非劉氏有也大魏之興觀五代之存亡而不用其長策觀前車之傾覆而不改其轍跡子弟王空虛之地君亡使民之失宗室竄於閭閻不聞邦國之政權均匹夫勢齊凡庶內無深根不拔之固外無盤石宗盟之助非所以安社稷爲萬世之業也魏高貴鄉公少康漢高祖論曰上問荀顛等曰有夏既衰后相殄滅少康收輯夏衆復禹之績高祖拔起壘畝芟夷秦項考其功德誰宜爲先顛等曰造之與因難易不同少康功德雖美猶爲中興與漢世祖同流可也至如高祖臣等以爲優上曰少康生於滅亡之後降爲諸侯之隸能布其德而兆有其謀卒滅過戈復禹之績祀夏配天不失舊物非至德弘仁豈濟斯勲漢祖因土崩之勢收一時之權爲人子則數危其親爲人君則但除苛禁爲人父則不能衛子身歿之後社稷幾傾若與少康易地而處或未能復大禹之績也推此言之宜高夏康而下漢祖也魏文帝周成漢昭論曰或方周成王於漢昭帝僉高成而下昭余以爲周成王體上聖之休氣稟賢妣之貽誨周召爲保傅呂尚爲太師口能言則行人稱辭足能履則相者導儀目厭威容之美

耳飽仁義之聲所謂沈漬玄流而沐浴清風者矣猶
有咎悔聆二叔之謗使周公東遷皇天赫怒顯明厥
咎猶啓諸金滕稽諸國史然後乃悟不亮周公之聖
德而信金滕之教言豈不暗哉夫孝昭父非武王母
非邑姜養惟蓋王相則桀光體不承聖化不胎育保
無仁孝之質佐無隆平之治所謂生於深宮之中長
於婦人之手然而德與性成行與體并年在二七早
智夙達發燕書之許亮霍光之誠豈將有啓金滕信
國史而後乃悟哉使夫昭成均平而立易世而化質
臣而治換樂而歌則漢不獨少周不獨多也 魏丁

儀周成漢昭論曰成王昭帝俱以襁褓之幼託於冢
宰流言讒興此其艱險相似者也夫以發金滕然後
垂泣與計日力便覺詐書明之遲速既有差矣且叔
父兄子非相嫌之處異姓君臣非相信之地霍光惟
人謗而不出周公賴天變而得入推此數者齊本而
論末計重而况輕漢昭之優周成甚明者也成王秀
而獲實其美在終昭帝苗而未秀其得在始必不得
已而論二主余與夫始者 魏曹植漢二祖優劣論
曰客有問余曰夫漢二帝高祖光武俱爲受命撥亂
之君此時事之難易論其人之優劣孰者爲先余應

帝王
卷二十三
之曰昔漢之初興高祖因暴秦而起遂誅強楚光有
天下功齊湯武業流後嗣誠帝王之元勳人君之盛
事也然而名不繼德行不純道身沒之後崩亡之際
果令凶婦肆醜酷之心嬖妾被人豕之刑亡趙幽囚
禍殃骨肉諸呂專權社稷幾移凡此諸事豈非高祖
寡計淺慮以致然彼之雄才大略倣儻之節信當世
至豪健壯傑士也又其梟將畫臣皆古今之鮮有歷
世之希覩彼能任其才而用之聽其言而察之故兼
天下有帝位流巨勳而遺元功也世祖體乾靈之休
德稟貞和之純精通黃中之妙理韜亞聖之懿才其

爲德也聰達而多識仁智而明恕重慎而周密樂施
而愛人值陽九無妄之世遭炎光厄會之運殷爾雷
發赫赫神舉用武略以攘暴興義兵以掃殘神光前
驅威風先逝軍未出於南京莽已斃於西都夫其盪
滌凶穢勦除醜類若順迅風而縱烈火驅白日而掃
朝雲也爾乃廟勝而後動衆計定而後行師故攻無
不陷之壘戰無奔北之卒是以羣下欣欣歸心聖德
宣仁以和衆邁德以來遠故寶融聞聲而影附馬援
一見而歎息股肱有濟濟之美元首有穆穆之容敦
睦九族有唐虞之稱高尚純朴有羲皇之素謙虛納

下有吐握之勞留心庶事有日昃之勤乃規弘迹而造皇極創帝道而立德基是以計功而業殊比隆則事異旌德則靡愆言行則無穢量力則勢微論輔則力劣卒能握乾圖之休徵應五百之顯期立不刊之遐迹建不朽之元功金石播其休烈詩書載其勲懿故曰光武其優也 晉陸機辨亡論曰昔漢氏失御姦臣竊命禍基京畿毒徧宇內皇綱弛紊王室遂卑於是羣雄峰駭義兵四合吳武烈皇帝慷慨下國電發荆南權略紛紜忠勇伯世威稜則夷羿震盪兵交則醜虜授馘遂掃清宗祊蒸禋皇祖于時雲興之將

帶州巖起之師跨邑雖兵以義合同盟戮力然皆包藏禍心阻兵怙亂或師無謀律喪威稔寇忠規武節未有如此其著者也武烈既沒長沙桓王逸才命世弱冠秀發招攬遺老與之 巡業神兵東驅奮寡犯衆攻無堅城之將戰無交鋒之虜誅叛柔服而江外底定飭法修師則威德翕赫將軍北伐諸華誅鉏于紀旋皇輿於夷庚反帝座乎紫閣挾天子以令諸侯清天步而歸舊物戎車既次羣凶一側日大業未就中世而殞用集我大皇帝以奇蹤龍於逸軌睿心因乎令圖從政咨於故實播憲稽乎昔風而加之以篤固申之

以節儉疇咨俊茂好謀善斷東帛旅於丘園旌命交
乎塗巷故豪彥尋聲而響志士希光而景驚異人
輻輳猛士如林謀無遺詔舉無失策故遂割據山川
跨制荆吳而與天下爭衡矣故魏人請好漢氏乞盟
遂躋天號鼎峙而立於是講八代之禮蒐三皇之樂
告類上帝拱揖羣后虎臣毅卒循江而守長棘勁鏃
望颺而奮庶尹盡規於上四民展業於下化協殊裔
風行遐圻乃俾一介行人撫巡外域巨象逸駿擾於
外閑明珠瑋寶耀於內府珍瑰重迹而至奇玩應響
而赴轡軒騁於南荒衝朝自於朔野齊民免干戈之
患戎馬無晨服之虞而帝業固矣爰及末葉羣公既
喪然後黔首有瓦解之志皇家有土崩之釁歷命應
化而徵王師躡運而發卒散於陳民奔于邑城池無
藩籬之固山川無溝阜之勢軍未浹辰而社稷夷矣
雖忠臣發憤烈士死節將奚救哉夫曹劉之將非一
世所選向時人之師無曩日之衆戰守之道抑有前
符險阻之利俄然未改而成敗質理古今詭趣何哉
彼此之化殊授任之才異也 又辨亡論下曰昔三
方之士魏人據中夏漢氏有岷益吳制荆揚而掩交
廣曹氏雖功濟諸華虐亦深矣其民怨劉公因險飭

智功已薄矣其俗陋夫吳桓王基之以武太祖成之以德聰明睿達懿度深遠矣其求賢如弗及恤民如稚子接士盡盛德之容親仁罄丹府之愛拔呂蒙於戎行擢潘濬於係虜推誠信士不恤人之我欺量能授器不患權之我逼地方幾萬里帶甲將百萬其野沃其民練其器利其財豐東負滄海西阻險塞長江制其區宇峻山帶其封域國家之利未巨有弘於茲者矣借使中才守之以道善人御之有術敦率遺典勤民謹政循定策守常險則可以長世永年未有危亡之患易曰湯武革命順乎天○玄曰亂不極則治不形言帝王之因天時也古人有言曰天時不如地利易曰王侯設險以守其國言爲國之恃險也又曰地利不如人和在德不在險言守險之由人也吳之興也參而有焉孫卿所謂舍其參者也及其亡也恃險而已又孫卿所謂捨其參者也夫四州之萌非無衆也大江之南非乏俊也山川之險易守也勁利之器易用也先政之策易循也功不興而禍構何哉所以用之者失也故先王達經國之長規審存亡之至數謙已以安百姓敦惠以致人和寬冲以誘俊乂之謀慈和以結士民之愛是以其安也則黎元與之同

慶及其危也則兆庶與之共患安與衆同慶則危不可得也危與下共患則其難不足恤也夫然故能保其社稷而固其土宇麥秀無悲殷之思黍離無愍周之感矣 晉于寶晉武革命論曰史臣曰帝王之興必俟天命苟有代謝非人事也文質異時興建不同故古之有天下者柏皇粟陸以前爲而不有應而不求執大象也鴻荒世及以一民也堯舜內禪體文德也漢魏外禪順大名也湯武革命應天人也高光爭伐定功業也各因其運而得天下隨時之義大矣哉古者敬其事則命以始也今帝王受命而用其終豈

人事乎其天意乎 又晉紀總論曰史臣曰昔高祖宣皇帝以雄才碩量應運而仕值魏太祖創基之初籌畫軍國嘉謀屢中遂服輿軫驅馳三世性深奧有如城府而能寬綽以容納行任數以御物而知人善採拔故賢愚咸懷小大畢力爾乃取鄧艾於農隙引周秦於行役委以文武各善其事故能西擒孟達東舉公孫淵內夷曹爽外襲王凌神略獨斷征伐四克維御羣后大權在已屢拒諸葛亮節制之兵而東支吳人輔車之勢軍旅屢動邊鄙無虧於是百姓與能大象始構矣世宗承基太祖繼業玄豐亂內欽誕

外潛謀雖密而在機必兆淮浦再擾而許洛不震咸
黜異圖用光前烈然後推轂鍾鄧長驅庸蜀三關電
掃劉禪入臣天符人事於是信矣始當非常之禮終
受備物之錫名器崇於周公權制嚴於伊尹至於世
祖遂享皇極正位居體重言慎法仁以厚下儉以足
用和而不弛寬而能斷故民詠惟新四海悅勸矣聿
修祖宗之志思輯戰國之苦腹心不同公卿異議而
獨納羊祜之策至于咸寧之末遂排羣議而仗王杜
之決汎舟三峽介馬桂陽役不二時江湖來同掩唐
虞之舊域班正朔於八荒太康之中天下書同文車
同軌牛馬被野餘糧棲畝行旅草舍外閭不閉雖太
平未洽亦百代一時矣二十餘年而河洛爲墟戎羯
擅制二帝失尊山陵無所何哉樹立失權託付非才
四維不張而苟且之政多也夫天下者大器也器大
者不可以小道理勢重者不可以爭競擾古先哲王
知其然也是以扞其大患而不有其功禦其大災而
不尸其利是以感而應之悅而歸之如晨風之鬱北
林魚龍之趨淵澤也然後設禮文以理之斷刑罰以
威之故衆悅其教而安其俗君子勤禮小人盡力廉
耻篤於家閭邪僻銷於胸懷又况可奮臂大呼聚之

以干紀作亂之事乎加之朝寡醇德之士鄉之不二
之老風俗淫僻趣向失所學者以莊老爲宗而黜六
經談者以虛薄爲辨而賤名檢當官者以望空爲高
而笑勤恪劉頌屢言治道傳咸每糾邪正皆謂之俗
吏若夫文王日昃不暇食仲山甫夙夜匪懈者蓋共
嗤黜以爲灰塵而相詬病矣由是毀譽亂於善惡之
實情慝奔於貨欲之塗選者爲人擇官官者爲身澤
利其婦女莊櫛織紉皆取成於婢僕未嘗知女功絲
枲之業中饋酒食之事也故皆不耻淫泆之過不拘
妬忌之惡有殺戮妾媵有黷亂上下父兄不

下莫之非又况責之聞四教於古修真順於今以輔
佐君子者哉禮法刑政於此大壞如室之斯構而去
其鑿契如水斯積而决其隄防如火斯畜而離其薪
燎也國將亡本必先顛其末此之謂乎 唐太宗晉
武帝紀論曰我皇承基誕膺天命握圖御寓敷化弘
道是以佚道代勞以治易亂絕縑綸之貢去雕琢之
飾制奢俗以變儉約澆風而反淳雅好直言畱心採
擢劉毅裴楷以質直見容嵇紹許奇雖仇讎而不棄
仁以御物寬而得衆宏畧大度有帝王之量焉于時
民和俗靜家給民足聿修武用思啓封疆决神算於

深衷斷雄圖於議表馬隆西伐王濬南征師不延時
獯虜削跡兵無血刃揚越爲墟通近代之不通服前
王之不服禎祥顯應風教肅清天地之功成矣霸王
之業大矣雖登封之禮讓而不爲驕泰之心因斯以
起見土地之廣謂萬葉而無虞視天下之安謂千年
而永治不知處廣以思狹則廣可長存居治而忘危
則治無常治加之建立非所委寄失才志欲就于升
平行先迎於禍亂是猶將適越者指沙漠而遵途欲
登山者涉舟航而覓路所趣逾遠所向轉難南北倍
殊高下相反求其至也不亦難乎况以新習易動之

而無久安難拔之慮故賈充兇豎懷奸志而擁權
楊駿豺狼包禍心以專輔遂至宮車晚出諒闇未周
潘翰變親以成踈連兵竟滅其本棟梁廻忠而起僞
擁衆各舉其威曾未數年綱紀大亂以至海內版蕩
宗廟播遷帝道王猷反居文身之俗神州赤縣翻成
被髮之鄉棄所大以資人掩其小而自託爲天下笑
其故何哉良由失慎於前所以貽患於後且知子者
賢父知臣者明君子不肖則家亡臣不忠則國亂亂
國不可以安也亡家不可以全也是以君子防其始
聖人閑其端而世祖惑荀勗之奸謀迷王渾之僞策

心屢移於衆口事不定於已圖元海當除而不除卒
令擾亂區夏惠帝可廢而不廢終使傾覆洪基夫全
一人者德之輕拯天下者功之大棄一子者忍之小
安社稷者孝之大况乎資二世而成業延三孽以喪
之所謂取輕德而捨重功畏小忍而忘大孝聖賢之
道豈若斯乎雖則善始於初而鮮令終於末所以殷
勤史策不能無慷慨焉 又隋高祖論曰夫帝王受
命非因衆人之所舉既乘便之取不同優劣之勢各
異或雄圖內斷英謀外決海納山容如覆如載磊磊
落落真帝王者也只如文皇起自布衣臨馭四海歎

孤兒以致天下奪寡婦而登神器復留心萬姓務從
儉約自金陵滅後奢泰日滋起仁壽於五柞移新都
於灞岸合浦珠璣填於帑藏江南姬媛納於椒掖仁
壽之役萬姓力殫雕琢之功中民竭產從渭至霸寧
不爲勞移故就新理多其弊心隨地廣意逐時驕猜
忌無端觸途多諱文母夷戮兒母被誅牝雞鳴皇
枝勦絕廢長止少付託失人功臣良將誅夷備盡享
年不永豈非天乎

文宋顏延之爲湘州祭虞帝文曰惟哲化神繼天作
聖藏器漁陶致身愛敬是以二妃嬪德九子勳命在

麓不迷御衡以正唐歷既終虞道乃光咨堯授禹素
俎采堂百齡厭世萬里陟方敬詢故老欽咨聖君職
奉西湘虔屬南雲神之聽之匪酒伊葷 陳沈炯祭
漢武帝陵文曰臣聞喬山雖掩鼎湖之靈可祠有魯
遂荒大庭之跡不泯伏惟陛下降德荷蘭纂靈豐谷
漢道既登可望射之罘於海浦禮日觀而稱功
橫中流於汾河宿栢梁而高宴何其甚樂豈不然歟
既而運屬上僊道窮晏駕翠蓋一朝零落茂陵
玉椀遂出人間陵雲故基與原田而懸懸扶風餘跡

嚴助東歸駟馬可乘長卿西返恭聞故實竊有愚衷
黍稷非馨敢望徽福爵臺之心空愴魏君雍丘之祠
未光夏后瞻仰徽猷伏增悽懼 唐太宗祭魏太祖
文曰夫大德曰生資二儀以成化大寶曰位應五運
而遁昌貴賤廢興莫非天命故龍顏日角顯帝王之
符電影虹光表乾坤之瑞不可以智競不可以力爭
昔漢室豆分羣雄岳立夫民離政亂安之者哲人德
喪時危定之者賢輔伊尹之臣殷室王道昏而復明
霍光之佐漢朝皇綱否而還泰立忠履節爰在於斯
帝以雄武之姿當艱難之運棟梁之任同乎曩時匡

正之功異于往代觀沈溺而不拯視顛覆而不持幸
徇國之情有無君之跡既而三分肇慶黃星之應久
彰主卜啓期真人之運斯屬其天意也豈人事乎

表魏文帝讓授禪表曰臣聞堯禪重華舉其克諧之
德舜受文命采其齊聖之美猶下咨四岳上觀璇璣
今臣德非虞夏行非二后而承曆數之詔應選授之
命內自揆撫無德以稱且許由匹夫猶拒帝位善卷
布衣而逆虞詔臣雖鄙蔽敢忘守節 魏辛毗等勸
進表曰古先聖王所以授天命而不辭者誠急於答
皇天之意副四海之望不得已也 魏桓階等勸進

表曰臣等以爲天命不可稽神器不可黷昔周武中
流有白魚之應不待濟而大號以建舜受禪大麓桑
陰未移而已陟帝位所以祗承天命者若此之速也
故無固讓之義不以守節爲貴必信於神靈而符合
於天地也 晉劉琨勸進元帝表曰否泰之運古今
迭有宗子有明德曷常不由多難以隆中興故獫狁
殘周以啓宣王巨猾竊漢乃發光武陛下天授至德
聰明神武勞謙恭已卑以自牧體伯禽經營之誠行
公且吐握之事上崇勤王之義下垂庇民之量收羅
俊乂任賢以能綏爰陝東化流無外戎狄荒服請事

率職重譯納貢不遠萬里功高德劭遐邇歸心况陛下道邁太宗勲莫與二且以親以賢義實兼之是以琨敢緣天文人事徵祥之應昧死上事以奉尊號願陛下無常心以羣心爲心忘其身以萬物爲公則宗廟蒸嘗不替於今逆虜遁寇一討而滅無負於天下無愧於七后矣 又表曰臣聞台宿在天實承辰極股肱雖卑同體元首臣負前朝過充三吏國之崇替有與憂喜臣聞德合兩儀者固以四海爲公智周萬物者不以一身爲私舜禹揖讓以陟帝位湯武征伐以濟時難彼四王者邁會不同登受有異至夫外

已存物憂世遺躬其致一也期於愛民治國應變合道以爲天下利而已矣况宗廟是陛下之宗廟百姓是大晉之百姓耶陛下若忽七廟之重拒天人之心絕而不繼困而不拯則宗廟不歆其禋祀羣生無所措其手足矣况臣班具臣之列荷累世之恩上懷國家之統俯絕烏鳥之情者哉昔伍員發怒手撻平王之墓灌夫慷慨身搴吳淠之旗皆能宣其臣節據其私忿戮尸斬將存亡罔恨臣誠無若人之才實有此人之憤苟得上憑天威展其微効雖隕九泉猶以明白 又表曰陛下之躬執謙光允恭克讓俛從吏議

示總萬機布曠蕩之詔開自新之路海隅漸惠朔南
 暨聲有生之倫咸被嘉慶陛下量包宇宙明侔三辰
 靈祇稽應華戎同戴加以王室中微邦基將絕遺民
 元元屬命陛下陛下以德則無所與讓言事固所負
 荷誠宜遺小禮存大務援據圖錄居正宸極上副祖
 宗之心下一兆庶之望臣聞必也正名前聖大之春
 秋傳曰名以出信名苟不正則事有不從信苟不立
 則禮義或愆乃載籍之明誠開塞之所由也又表
 臣聞天生烝民樹之以君所以對越天地司牧黎
 民若此知天地不可以無君故稱

以奉之知黎元不可以無主故不得已而臨之社
 時難則戚藩定其傾郊廟或替則宗哲纂其祀所
 弘振遐風式固萬世自元康以來艱禍繁興永嘉
 際氛厲彌昏宸極失御登遐醜裔國家之危有如
 綏旒天不悔禍大災荐臻國未忘難寇害尋興逆胡
 劍曜縱逸西都王上幽劫復沈虜庭神器流離再辱
 荒逆臣每覽史籍觀之前載厄運之極古今未有在
 食土之毛含氣之類莫不叩心絕氣行號巷哭况臣
 荷寵二世位顯鼎司承問震惶精爽飛越臣聞昏明
 迭用否泰相濟天命無改曆數有歸或多難以固邦

國或隱憂以啓聖明是以齊有無知之禍而小白爲
五伯之長晉有驪姬之難而重耳以主諸侯陛下玄
德通於神明聖姿合於兩儀應命世之期紹千載之
運符瑞之表天人有徵中興之肇圖讖垂典自京畿
殞喪九服崩離陛下撫寧江左奄有舊吳柔服以德
伐叛以刑抗明威以懾不類仗大順以肅宇內純化
既敷則率土宅心義風旣暢則遐方企踵昔少康之
隆夏訓以爲美談宣王之興周詩以爲休詠况茂勲
裕于皇天清暉光于四海蒼生顛然莫不欣戴聲教
加願爲臣妾者哉且宣皇之胤唯陛下億兆攸

歸曾無與二天祚大晉必將有主王晉祀者非陛下
而誰是以邇無異言遠無異望謳歌者無不吟詠徽
猷獄訟者無不思于聖德天地之際旣交華裔之情
允洽一角之獸連理之木以爲休徵者蓋有百數冠
帶之倫要荒之衆不誅而同辭者動以萬計是以臣
等敢考天地之心因幽夏之趣味死上尊號願陛下
存舜禹至公之情狹巢由矯抗之節以社稷爲務不
以小行爲先以黔首爲憂不以克讓爲事上以慰宗
廟乃顧之懷下以釋普天傾首之望臣聞尊位不可
久虛萬機不可久曠虛之一日則尊位以殆曠之決

辰則萬機以亂陛下雖欲逡巡其若宗廟何其若百
姓何 梁江淹齊高帝讓禪表曰陛下遠視唐虞永
揖之典近摹漢魏高讓之禮既鑿金水昏明之數又
協雲雷興替之徵若乃與能之交禪錫之會豈伊虛
薄所可遵擬昔傅巖佐商秩終上公磻谿翼周名極
列伯臣才非半古功愧逮聖獄訟不往謳歌寧歸河
乏馬圖之寶天無棄物之錫伏願陛下遺舜禹之心
俾臣守巢由之節則日月濯浸飛泳 齊謝朓
為百官勸進齊明帝表曰臣聞時乘在御必待先天
之業神化為皇乃叶應期之運况復湯孫有緒慕

德舊邦竹新復禹歸 大齊之權輿寶曆孕育前

古昭假四海克酬三靈 嗣命疾威蕃鄙叛渙委喪

御寓彝鼎如忽陛下文 體道狗齊作聖翦應龍於

冀州戮長蛇於沮水榮 之瑞昭迺延喜之寶潤色

天睠爰發人謀咸贊伏 陛下仰答靈祇弘宣景命

誕受多方奄宅萬國 陳沈炯為羣臣勸進梁元帝

初表曰蠢爾羯胡遂憑 大邑闔闔受白登之辱象魏

致堯城之疑臣聞喪君 有君春秋之茂典以德以長

先王之通訓少康則收 衆撫職祀夏所以配天平王

則居正東遷宗周所以 十世漢光以能補不道故景

歷重昌中宗以不違君議故江東可立天其祚梁必將有主軒轅得姓存也一人高祖五王代實居長功高九有道濟生民非聖明誰嗣下武日月貞明太陽不可以闕照天地觀乾道不可以久惕寶器存乎至重介石慎於易黔首豈可以少選無君宗祏豈可以一日無主一表曰紫宸曠位赤縣無主百靈聳動萬國迴遑醒醉相扶回歸景毫或謳且誦總赴唐郊陛下沈沈謗然讓德不嗣臣聞星迴日薄擊雷鞭電者之謂八岳立川流吐霧蒸雲者之謂地包天地之混成洞陰陽之不測而以則成萬物者

其在聖人乎故云天地之大德曰生聖人之大寶曰位黃屋廟堂之下大非獲已所安明鏡四衢之尊蓋由應物取訓陛下稽古文思英雄特達比以周旦則文王之子方之放勛則帝摯之季千年旦暮可不在斯庭闕湮亡鐘鼎淪覆嗣膺景業非陛下而誰豈可使赤眉更立盆子隗囂託置高廟陛下方復從容高讓用執謙尊展其矯行偽書誕罔正朔見機而作斷可識矣不疑何卜無待著龜日者公卿失馭禍纏霄極獯羯憑陵奸臣互起師戎伐潁無處不然勸乎誅晉側足皆爾宗社不墜繫在聖明今也何時而申帝

啓之避凶危若此方陳太伯之辭國有具臣誰敢奉
詔 第三表曰日者百司岳牧仰祈宸鑒以錫珪之
功旣歸有道當璧之禮允屬聖明而優詔謙冲窅然
凝貌謳歌載馳是用翹首楚人固執燻丹穴以求君
周民樂歸越岐山而事主漢王不卽位無以貴功臣
光武止蕭王豈謂紹宗廟陛下英威茂略雄圖武筭
指撝則丹浦不戰顧盼則陂泉自蕩地維絕而重組
天柱傾而更植縱陛下拂衣而遊廣成登弁山而去
東土羣臣安得仰訴萬物何所歸仁况郊祀配天疊
築禮曠齋宮清廟匏竹不陳豈可久稽禮議有曠

典 陳徐陵勸進梁元帝表曰臣聞封唐有聖還承
帝嚳之家居代維賢終纂高皇之祚至如金行重作
源出東莞炎運猶昌枝分南頓莫不因時多難俱繼
神宗者也陛下握符執鉞將在御天玉勝珠衡先章
元后神祇所命非惟太室之祥圖書斯歸何止堯門
之瑞星躔東井時破嶠潼雷震南陽初平尋邑宗王
啓霸非勞武德之侯清蹕無虞何事長安之邸正應
揚龍旂以饗帝御鳳展以承天歷數在躬疇與爲讓
豈可逡巡固讓方求石戶之農高謝君臨徒引箕山
之客未知上德之不德唯見聖人之不仁 陳沈炯

帝三 卷二十三
為百官勸進陳武帝表曰臣聞春榮秋落四時所以迭代金行水流五德所以互序昔陶唐告終有虞氏作漢魏禪讓晉宋以之登庸夫有非常之功有非常之賞能利天下者受天下之利陛下造化之功日用之德褰裳去之物誰仰訴頃五星夜聚八風通吹豐露呈甘卿雲舒族白狼遠至素雉朝飛天意顯然靈貺可覩

章魏曹植慶文帝受禪章曰陛下以聖德龍飛順天革命允荅神符誕作民主乃祖先后積德累仁世濟其美以暨于先王先王勤恤民隱劬勞戮力以除其害經營四方不遑啓處是用隆茲福慶光啓于魏陛下承統纘戎前緒克廣德音綏靜內外紹先周之舊跡襲文武之懿德保大定功海內為一豈不休哉又慶文帝受禪上禮章曰陛下以明聖之德受天顯命良辰即祚以臨天下洪化宣流洋溢宇內是以溥天率土莫不承風欣慶執贄奔走奉賀闕下况臣親體至戚懷歡踴躍

議宋顏延之武帝謚議曰以為聖哲同風功美殊稱蓋出乎道者無方故刑于物者不一伏惟道塞人神信通期運愛敬所稟因心則遠英粹之照正性自天

體苞潛躍慮周卷舒龍德在陰雖艱貞而不悶因時
而惕故有來其必亨在晉之季皇塗荐阻櫬槍干紀
璇璣失馭天鑿靈武民屬聖明不假十室之資不藉
百乘之賦首義馳風一鼓靜亂滌除泰階消殞薄蝕
斯亮登庸之基經綸之始者也內難雖弭外圖未輯
河華海岱負固相望荆濮燕亳侯服交侵眷言帝畿
思康上路戎不再駕遺氓卽序斥埃之所未羈亭徼
之所不譯莫不飾誠請罪欵塞來賓故能洒掃中嶽
致朝九山神道會昌寶命旣集損之而益後身愈先
旣而儀形帝載攝讓大歷改玉乎文祖班瑞于神宗
貞章寢機文武擗笏故宸居兩楹坐一八表國訓成
均之學家沾撫幸之仁大美配天必終之以儉德道
固萬葉猶申之以話言允所謂教思無窮樹之長世
取高上代顧邈前王矣梁沈約齊武帝謚議曰臣
聞天德平分而四時之名或異聖功一揆而皇王之
稱不同蓋跡因隨事名由義立堯臣禹佐咸率茲典
伏惟盡寂窮微含神獨照德茂始蒙之主道冠初耜
之君含精靈於五緯駕貞明於三象初九勿用英氣
凌雲負揭日月仰揚霄漢龍姿鳳采煥若麗天登庸
在試盛績雲舉雖屈景潢汗降情尺木而拯世濟民

浚發懷抱昔成湯百家仁被比屋文王十里化先寡
妻前聖後賢重規杳矩震雄圖於九江播靈威於夏
汭旌旆未麾鯨鯢自殞弗勞羌燹之長無待六事之
人義等伐謀功高善陳建有國之符成定鼎之業會
朝清明事資於牧野受命作周非止於西伯視瞻寢
門孝德光備守器宗祧元良載遠嗣大寶以君百辟
敷景化以致隆平守在四夷威行海內罔固寂寞禮
讓交興八柄馭下九官咸事臨朝歿默尊嚴若神風
行日烜無思不暢至仁與造化爭流靈威與雷霆齊
軌上貫蒼昊下洞深泉春無凄風夏無苦雨時若罔
愆多稔如積三革不累五刃不砥庠塾大啓儒雅雲
集訓閱得宜蒐狩有序丹徼青丘之野跂踵反舌之
民浮深駕阻迴首革面北夷畏力獻琛內欵不藉終
軍之使無假絕漠之威嘉祥霧合秘瑞泉涌史不輟
文簡無虛日方當垂七曜之旗駕八龍之乘望禮中
赫肆覲羣后造化不仁穆上愆應慕切遺弓哀同遏
密晦朔不居殞宮將啓勤茲大名宜盡徽極 梁沈
約齊明帝謚議曰臣聞君德靡二辟王之名不一聖
功無爽堯禹之稱或殊兼以拯世寧亂致平未必同
道崇墀增祧嘉號不可相襲伏惟自天誕睿英聖在

躬皇矣之符夙著烝哉之謠早集賓門納揆天平地
成自南自北無思不避在屬負圖導揚末命值嗣主
狂凶人倫道盡宗社阡危瞻烏靡託國難立長亂極
治刑四海樂推三靈以眷東向而讓天下功高代入
流涕而膺寶位如就重負日昃勞躬親庶事撫辜
納隍之念義同於罪已振民厚下之情無廢於終食
聰明神武逖聽邇聞萬目備張絃綱靡漏御轡不迷
寧藉聽於襄野大川可濟不待備於舟楫崢嶸之下
澤靡不懷寥廓之上明無不燭包以宇宙潤以風雨
霜露所交人跡所至百姓仰之而不知其始萬物用
之而罔識其終上庠盛業忽焉已久三載弗爲淪強
將及臨朝引領思隆雅訓貴遊胥萃俊造成羣方將
驅世反本旣仁且壽告成東嶽高宴汾陽造化不仁
厭世云及放勳之慕不追負鄉之思空遠殯宮將撤
輶軫難留英聲茂實於是乎在 梁任昉齊明帝謚
議曰以爲窮神之跡無繼於成名教思所宗言歸於
有稱是以則天爲大義盡於翼善武功受命理貫於
斯文伏惟功高五讓道冠三極愛敬始於揚名孝饗
終乎嚴配寥廓大度誕君人之符閨庭小節應軌物
之訓歷試允諧納揆時序貽厥之寄義均負圖棖棟

惟新歷焉將及於是承制宣德定策公卿登嗣后於
西鍾反獨夫於侯服既而主幼時艱仍離屯蹇應當
璧之祥注息肩之願立德以長紹開中興擬度天行
取則乾健日昃罷朝幽枉必達官曹寂寞固狃空虛
虎門肆義大足協律巖廊有緝紳之談鄉塾無橫議
之士既富而教弘此孝治遂使家無蕩子野有栖畝
寘天下於掌握覽八荒於戶牖寵微金穴之家恩絕
椒風之館天應民和祥符總暨故能上變雲物下漏
深泉若乃青丘丹陵之國黃銀紫玉之瑞幽符遠萃
詢德報功方將馳道日觀清宮鳴澤爲而不恃高揖
成功百川所以朝宗參辰於焉取正豈所謂中衢均
奠縣衡共軌者歟 梁元帝高祖武皇帝謚議曰臣
聞翼善傳聖曰堯仁聖盛明曰舜受禪成功曰禹除
虐去殘曰湯謚者行之跡號者功之表雖賤不誅貴
卑不誅尊而彰乎名者盛德之嘉號也被於物者治
定之實錄也斯所以聲明煥乎鍾石昭晰備於絃管
者焉伏惟天縱欽明惟睿作聖功超三五聲踰七十
仰之彌高就之彌遠載潛載躍乃武乃文先是木運
告終羣后改屬乾維罔構地紐如崩桃祀陸危公卿
盱食九牧有淪胥之悲八表興橫流之歎乃凝威黑

水表瑞丹陵雲合景從表裏禔福受終文祖允恭克
讓知黔首不可以無歸蒼生不可以無主降汾陽之
遠志不得已而臨之於是類帝裡宗革命創制稀郊
式展殷薦斯潔臨茲大寶化與和氣俱宣扇此王風
政與秋霜並肅言懸日月功格區宇不以紫宸爲貴
不以黃屋爲尊政謚刑措民殷國阜虹旌式卷堡燧
載清霄象相因環楛無曠天衢亨泰王道升平南海
候風東溟奉貢膏露凝枝慶雲觸石山開蒼壁地出
玄珪驃騎把鉞則休屠歛塞太尉抗旌則名王蹙角
教所漸泱靈地之都感今所行通燭龍之外開庠

序布濩於成均正俗移風氛氲於司樂虛納十亂
引諒直之規廣闢四門弘招賢之德青衿知擊壤之
性黃髮恣鼓腹之歡加以鑽味微言研精至道文終
所牧之典史倚所讀之書無輟萬機日且千遍馳郁
郁之聲表乾乾之德允所謂皇哉君哉日用而不知
者矣方且告成岱嶽鏤升平之玉簡昭事梁甫秘禮
首之金繩而文王明夷事倅往冊黃帝橋山痛深前
典萬有淪傷三辰掩曜人祗軫慕山海含悲慟切陟
方哀深遏密煩寃荼毒貫切心髓風樹不靜陟岵何
期思所以欽若九功仰稽七德 北齊邢子才文宣

帝謚議曰伏惟聖德光遠神猷弘大初自登庸民譽所集把尺持刀成務斯在百揆載清四門唯穆及天眷旣屬人謀所歸鳥獸遷情士女革面敬順天人拱揖羣后處無上之尊居域中之大禮盛樂修時和歲稔海內有截天下泰然猶憂勞億兆經營四國同虞舜之巡省若軒轅之靡寧威武紛紜神功四暢怨西以東化南自北臨瀚海以浴兵登天山而繼馬左縈右拂擬歌成章方朝百神於太華受萬國於稽嶺升中增封高拱垂衣而天喪黎庶奄搶四海考妣之慕實被含生稱天作誅抑唯恒數故以名追實盡物未臻其美屈道從制一日可以成名

勅梁沈約武帝踐祚後與諸州郡勅曰欽惟遂古爰及近代雖禪代異時而成功一揆豈惟靜民寧亂實由符運總集故能啓業垂統光宅區夏齊氏邁茲昏詖斯亡奄及民命蠢蠢倒懸非喻朕大懼四海舟覆二象雲傾億兆與岷岡並燎緝紳與蘊崇共日永言悽悼發憤經營推鋒投袂電擊風掃藉上天之靈因熊羆之用德未半古功侔前烈齊民旣欽若虞夏高揖萬邦兼以冥符先著樂推攸在幽顯宅心辭不獲命猥以虛寡君臨萬國川壑之懷寤寐盈慮方欲昧

且不顯日昃忘勞思與賢能康濟世道卿擁旄萬里
共治是寄當求民瘼留念獄市威斷以御強猾仁惠
以撫貧孤使遠近幽深咸得其所方虛位欽能懸爵
佇効勿令漢代璽書獨行於自古晉世班條靡用於
茲日想加克勉副其側席

令晉元帝荅劉琨等令曰今方岳牧伯之任股肱腹
心之臣萬邦之內九服之外咸見翼戴以隆天威是
用辭不獲已而居王位尋覽所陳弘旨優遠孤方當
匡復帝祚豈可猥居極位昔有夏克復賴靡艾之勲
周宣中興由申邵之佐二公鎮御幽朔忠以衛上建

功拯難實憑遠略夷難雪耻於是乎在 梁任昉齊
宣德皇后臨朝荅梁王令曰承固茲謙揖未膺大典
敬復雅旨良有慙然夫至寂難原言象所絕教思有
律感通斯在所以異人者神明同人者用舍王誕茲
上睿對越天行德冠二儀化周羣動生民以來一人
而已但達節弘道每濡跡於中庸神照惟幾不抑心
於鑽仰范宣旣讓其下取則况聖圖睿範歌思是歸
廉約雖弘慶賞遂替誠賢者悅義長難進之風不肖
者矜功沮竭力之効勸沮之間所差已遠王何得不
暫紆雅尚允荅天人使朕夜艾以安早朝有預今遣

率茲百辟申薦誠欵萬致一塗煩言可略 又敦勸
梁王令曰夫功不在賞故庸勲之典蓋闕施倖造物
則謝德之塗已冥要不得不強為之名使銓宰有寄
王實天生德齊聖廣淵重構參辰而九星仰止不易
日月而二儀貞觀在昔晦明隱鱗戢翼博通羣籍而
讓齒乎一卷之師劔氣凌雲而屈跡於萬夫之下辯
析天口而似不能言文擅雕龍而成輒削藁爰在弱
冠首膺弓旌客遊梁朝聲華藉甚隆昌季年勤王始
著建武惟新締構斯在功隆賞薄嘉庸莫疇一馬之
田介山之志愈厲六百之秩大樹之號斯存及擁旄
司部代馬不敢南牧推轂樊鄧胡塵罕嘗夕起惟彼
狡童窮凶極虐衣冠泯絕禮樂崩喪旣而鞠旅誓衆
言謀王室白羽一麾黃馬底定甲旣鱗下車亦瓦裂
致天之屈拱揖羣后豐功厚利無得而稱是以祥光
總至休氣四塞五老遊河飛星入鼎元功茂勲若斯
之盛而地狹乎四履勢卑乎九伯帝有惡焉輶軒萃
止今遣率茲百辟人致其誠庶匪席之旨不遠而復
又重敦勸梁王令曰朕聞匹夫好仁義在磨踵君
子行道達斯兼濟未有盡器窮神蘊徽章乎天植高
莫中樽觀傾壘而弗拯惟王德冠往初功無與二四

時等契兩曜齊明擬度天行取則乾健而運距艱季
道極百王援義而起一戎大定羅山革草罔不率從
用使商庭產慈周闕樹梓傾宮旣散鹿臺靡蓄盛德
大業巍巍若此日者事岐之號爰發帝言殊物備禮
率由寡昧雖復雲罕載路清蹕啓行昭德報功未臻
其極而高揖天休遠存克讓俾予未亡與慙日曷今
遣率茲百辟人致誠請庶有感睿心霈然降志

賤梁任昉爲百辟勸進梁王賤曰伏承嘉命佇策明
公逡巡盛禮斯實謙尊之旨未窮遠大之致向者嗣
君棄常自絕宗社國命民生翦爲仇讐折棟崩榱壓

焉自及卿士懷脯斲之痛黔首懼比屋之誅明公亮
格天之功拯水火之切再踵日月重綴參辰反龜玉
於塗泥濟斯民於阮岸使夫匹婦童兒羞言伊呂鄉
校里塾耻談五霸位卑乎阿衡地狹於曲阜明公宜
祇奉天人允膺大禮無使後予之歌同彼胥怨兼濟
之仁翻爲獨善又賤曰近以朝命蘊崇冒奏丹誠
奉披還令未蒙虛受縉紳顛顛深所未達蓋聞受金
於府通人之弘致高蹈海隅匹夫之小節是以履乘
石而周公不以爲疑增玉璜而太公不以爲讓况世
哲繼軌先德在民經綸草昧歎深微管加以朱方之

役荆河是依班師振旅大造王室雖復累跡救宋重
祗存楚居今觀古曾何足云而惑甚盜鍾功疑不賞
皇天后土不勝其酷是以玉馬駿奔表微子之去金
版出地告龍逢之怨明公據鞍輒哭厲三軍之志獨
居淹涕激義士之心故能使海若登祗罄圖効祉山
戎孤竹束馬景從伐罪弔民匡時靖亂匪叨天功實
勤濡足且明公本自諸生取樂名教道風素論坐鎮
雅俗不習孫吳構茲神武驅盡誅之氓濟必封之俗
龜玉不毀誰之功歟獨爲君子將使伊周何地某等
不達通變實有愚誠不任慙欵棘心重謁伏願特膺
典策式副民望

序梁沈約武帝集序曰文思安安欽明所以光宅日
月光華南風所以興詠日角之主出自諸生銳頂之
君少明古學漢高宋武雖闕章句歌南風以還沛好
清談於暮年夫成天地之大功膺樂推之寶運未或
不文武兼資能事斯畢者也我皇誕縱自天生知在
御清明內發䟽通外興爰始貴遊篤志經術究淹中
之雅旨盡曲臺之奧義莫不因流極源披條振藻若
前疑往滯舊學罕通而超然直詣妙拔終古善發談
端精於持論置壘難踰摧鋒莫擬有同成誦無假含

毫興絕節於高唱振清辭於蘭畹至於春風秋月送
別望歸皇王高宴心期促賞莫不超挺睿興濬發神
衷及登庸歷試辭翰繁蔚戡記風動表議雲飛雕蟲
小藝無累大道懷君人之大德有事君之小心爲下
奉上形於辭旨雖密奏忠規遺藁必削而國謨藩政
存者猶多逮乎俯應歸運仰修乾錄載筆握簡各有
司存如綸之旨時或染翰暨於設簾靈囿愷樂在鎬
鹿鳴四牡皇華棠棣之歌伐木採薇出車杖杜之讌
皆詠志摘藻廣命羣臣上與日月爭光下與鍾石比
韻事同觀海義等窺天觀之而不測遊之而不知者
矣竊惟左史記言右史記事君舉必書無論大小况
乎感而後思思而後積積而後滿滿而後言若斯而
已哉謹因事立名隨源編次

啓梁沈約賀齊明帝登祚啓曰竊惟皇源浚遠帝寶
連暉基深慶厚道貫萬葉而鬱林凶德早樹行悖人
經逖聽之所未書宗廟之殆如綴百靈聳動九服廻
遑結后來之望思庇民之主日月以異遐邇翹心伏
惟陛下大聖在躬君德夙表龍章日綵煥若麗天納
麓賓門道風遐被眷化神行無思不洽獄訟允歸天
人戴仰仰飛龍之眇轡紆汾陽之遠情運堯心以臨

億兆敷舜烈以膺寶命雖中宗之興殷道宣后之隆
漢德異世同符千載一揆刑措之業方遠隆平之基
在焉率土含欣懷生戴賴况臣早蒙覆潤夙荷恩靈
踊躍外畿心不勝慶謹緝民和式流星澤塗歌里林
戴懷鳧藻

唐類函卷二十三 終

符命

明東吳俞安期彙纂

明新野馬化龍校訂

奇表 帝系 幼穉

帝王部四

符命 帝誕 設憂

○符命一

藝文類聚初學 記雜採成篇

春秋潛潭巴曰里社鳴此里有聖人其响則百姓歸

社里之君也鳴則教令行 唯聖人能之响鳴之怒也

春秋孔演圖曰天子

皆五帝之精寶各有題序以次運相據起必有神靈
符紀使開階立遂 河圖挺佐輔曰黃帝修德立義
天下大治乃召天老而問焉余夢見兩龍挺白圖以

帝王

卷二十四

符命

授余於河之都天老曰河出龍圖維出龜書紀帝錄
列聖人之姓號與謀治太平然後鳳皇處之今鳳皇
以下三百六十日矣天其受帝圖乎黃帝乃被齋七
日至於翠嬀之川大鱸魚折溜而至乃與天老迎之
五色畢具魚汎白圖蘭葉朱文以授黃帝名曰錄圖
尚書中候曰帝堯卽政榮光出河休氣四塞龍馬
銜甲赤文綠色甲似龜背五色有列星之分斗政之
度帝王紀錄興亡之數 又曰伯禹曰臣觀河伯面
長人首魚身出水曰吾河精也授臣河圖 又曰天
乙在亳諸鄰國襁負歸德東觀乎維降三分璧黃魚

雙躍出濟于壇化為黑玉赤勒曰玄精天乙受神福
伐桀克 又曰季秋赤雀銜丹書入豐止于昌戶昌
拜稽首受最最要者也曰姬昌蒼帝子 又曰呂尚釣磻
谿得玉璜刻曰姬受命呂佐旌旌理也 又曰武王發
渡于孟津中流白魚躍入王船王俯取魚長三尺有
文王字 雒書靈准聽曰舜受終鳳皇儀黃龍感朱
草生冀莢孳西王母授益地圖西王母得益地之圖以獻 尚書
璇璣鈴曰禹開龍門導積石玄圭出刻曰延喜玉受
德天賜佩禹功既成天出玄圭以賜之古者以 春
秋元命苞曰殷紂之時五星聚於房房者蒼神之精

周據而興

周起於房而五星聚之得天下之祥

尚書帝命驗曰東南

紛紛注精紀昌光出軫巳圖之鄭玄注曰謂劉氏也

謂火精當起翼軫之野 尚書考靈曜曰河圖子提

期地留赤用藏龍吐珠鄭玄注曰河圖子劉氏而提

起也珠寶物喻道也赤漢當用天之秘道故河龍吐

之 隋巢子曰昔三苗大亂天命夏禹於玄宮有大

神人面鳥身降而福之司祿益富而國家實司命益

年而民不夭四方歸之禹乃克三苗而神民不違

墨子曰夏桀時天乃命湯於驪官有神來告曰夏德

大亂亡矣之早必使汝大戡之 又曰商王紂時

武王見三神曰予既沈瀆殷紂于酒德矣汝往攻之

予必使汝大戡之 又曰赤鳥銜珪降周之岐社曰

命周文王伐殷有國河出錄圖地出乘黃天錫武王

黃鳥之旗 呂氏春秋曰周文王時見大赤鳥銜書

集于周社文王曰火氣勝故其色上赤 周語內史

過曰昔夏之興也夜融降於崇山其亡也回祿信於

聆隧商之興也檮杌次於丕山其亡也夷羊在牧周

之興也鸞鷲鳴於岐山其衰也杜伯射王於鄗是皆

神明之志者也 帝王世紀曰禹父既放降在匹庶

有聖德夢日洗於河西四嶽師舉之舜進之堯 史

記曰高祖被酒夜經鄠西澤中令一人行前行前者
還報曰前有大蛇當徑高祖乃前拔劍斬蛇蛇分為
兩道開後人來至蛇所有一老嫗夜哭問之嫗曰吾
子白帝子化為蛇當道今為赤帝子斬之因忽不見
秦始皇帝常曰東南有天子氣於是東遊高祖隱於
芒碭山澤間呂后與人俱求常得之高祖怪問呂后
呂后曰季所在山居常有雲氣故往常得季 又曰
范增說項羽曰沛公居東會於財貨好美姬今入關
財貨無所取婦女無所幸此其志不在小吾令人望
氣皆為龍虎成五采此天子氣也 漢書曰高祖元

年冬十月五星聚于東井從歲星也

東井秦分野漢以義取天下之

也 又曰昭帝時上林柳樹斷卧地一朝起立生枝
葉有蟲食其葉成文字曰公孫病已立 又曰昌邑
王問社有枯樹復生枝葉畦孟以為木下民象當有
廢改之象公孫氏從民間受命為天子者後宣帝立
帝本名病已 東觀漢記曰光武帝夜生時有赤光
室中盡明皇考異之使卜者王長卜之長曰此善事
不可言是歲有嘉禾生一莖九穗長大於凡禾縣界
大豐熟因名上曰秀 又曰光武從邯鄲避王郎兵
至滹沱河導吏還言河水流澌無船不可渡左右皆

惶畏爲王郎所及上命王霸前往視之實然霸念還
言驚衆雖不可渡且臨水止尚可爲阻卽白曰水堅
可渡士衆大喜上大笑曰果妄言也叱至河流漸冰
合可履彊以囊盛沙布冰上乃渡渡未畢數車而冰
陷也 又曰上歸舊廬望見廬南有火光以爲人持
火呼之光遂赫然屬天有頃不見止異之 又曰諸
將請上尊號初王莽時上與伯叔及姊葺鄧晨穰人
蔡少公坐語少公道誠言劉秀當爲天子或曰是國
師劉子駿也上戲曰何由知非僕也坐者皆大笑時
傳聞赤伏符不見文章軍中所上未信到鄴上所與

長安同舍諸生彊華自長安奉赤伏符詣鄴與上會
羣臣復伏固請乃命有司設壇于鄴之千秋亭六月
卽皇帝位 魏氏春秋曰明帝青龍三年張掖郡刪
丹縣金山玄川溢涌寶石負圖狀象靈龜立于川西
有石馬七其一仙人騎之其一羈絆之其五有形而
不善成有玉匣開蓋於前上有玉字玉玦二玉璜一
又有麒麟在東鳳皇在南白虎在西犧牛在北馬自
中布列南方有字曰大紂曹金但取之此司馬氏革
運之徵 魏志曰桓帝時有黃星見於楚宋之分遼
東殷馗善天文言後五十歲當有真人起於梁沛之

間其鋒不可當至是凡五十年而太祖破袁紹天下莫敵矣 吳錄曰孫堅墓上數有光如雲氣五色上屬天下蔓延數里父老相謂曰此非凡氣孫氏其興乎 吳書曰孫堅母懷妊夢腸繞吳閭門孫策母懷策夢月入懷懷孫權夢日入懷 臧榮緒晉書曰王廙為鄱陽太守有枯樟樹更生王敦表勸進中宗曰皓獸應瑞而來臻樟樹久枯而更榮 孫盛晉陽秋曰秦始皇時望氣者言五百年後金陵之地有天子氣詳前瑞篇又曰太安中歲鎮辰太白四星聚於牛女之淵後中宗卽位於揚州也 又曰太安中童謡曰

五馬浮渡江一馬化為龍永嘉大亂王室淪覆唯琅琊西陽汝南南頓彭城五王獲濟至是中宗登祚先是五鐸見於晉陵靈數玄感若合符契 徐爰宋書曰武皇帝彭城縣綏興里人夜生有神光之異室內盡明是夕甘露降于墓樹少嘗遊下邳遇一沙門于逆旅舍沙門言及中原多故又云江表尋復喪亂能拯之者其唯君乎其意甚切至初高祖患手創積年未瘳沙門因出懷中黃散一裹留之沙門既去高祖追而望之倏忽不見以散治創一傅而愈餘散寶錄之每被金創輒用有驗 又曰高祖舉目瞻睞常見

二龍在焉始尚微小及貴龍形漸長光色轉明左右侍者亦數見徵異晉陵人韋敷少以占相爲事其言多驗嘗相高祖曰君當位至方伯久之又曰君相轉進貴不可言唯願富貴無相忘高祖北征至洛陽常有紫雲見於軍上後魏本紀曰孝文母李夫人皇興元年八月戊申生帝於平城紫宮神光照於室內于寶搜神記曰虞舜耕于歷山得玉曆於河際之巖舜知天命在己體道不倦武昌記曰孫權獵於樊山見一媪問獵何得荅曰止得一豹媪曰何不豎其尾忽然不見因爲立樊媪廟豫章記曰松陽門

內有大梓樹大四十五圍舉樹盡枯死永嘉中一日忽更榮茂太興中元皇帝果繼大業庾仲初揚都賦所云槐木蒼于豫章郭璞南郊賦云弊梓擢秀于祖邑也宣帝祖爲豫章太守故云祖邑也琴操曰受命者謂文王受天命而王文王以紂時爲岐侯躬修道德執行仁義百姓附親是時紂爲無道刳胎斲涉廢壞仁人天統易運諸侯瓦解皆歸文王其後有鳳皇銜書於文王之郊文王曰殷帝無道虐亂天下皇命已移不得復久乃作鳳皇之歌其章曰翼翼翔翔彼鸞皇兮銜書來游以命昌兮瞻天案圖殷將亡兮

蒼蒼昊天始有萌兮神連精合謀於房兮 又曰魯
哀公十四年西狩薪者獲麟擊之傷其左足將以示
孔子孔子道與相逢見俛而泣抱麟曰爾孰為來哉
孰為來哉反袂拭面仰視其人龍顏日角夫子奉麟
之口須臾吐三卷圖一為赤伏劉季興為王二為周
滅夫子將終三為漢制造作考經夫子還謂子夏曰
新主將興其人如得麟者

符命二 北堂書鈔

案本作徵應所載與符命同

神武有徵應 漢書 里社鳴聖人出 詳類聚 黃河清聖人生

夜融降于崇山 檇杪次于不山 並詳類聚 姬受命 尚書

中候 卯金興 河出圖 雒受法 尚書中候 黃精受道 河

精授圖 尚書中候 握圖書 得地符 玄女授符 詳武湯功篇

受金符 詳應運篇 奉赤伏符 後漢書 蒼代玄 持金精 握

金鏡 擊玉鼓 朕由薄承 出軫握命 尚書考靈曜 仁

命在豐 當璧而拜 詳恒山篇 代殷者為姬昌 代漢者

當塗高 五星聚房 元命苞 五曜霄映 五星聚房井

詳類聚 四星聚牛女 晉陽秋 鎮星入關 黃星見楚宋 魏志

參御馬 卯生虎 青雲扶日 黃雲蓋之 並詳紫雲

雲見於軍上 宋書 嘉氣飛於庭前 千秋鏡賦 御天社內有赤

紫氣 長安獄中有天子氣 漢書 黃雲見河 神龍見

神龍至 龍吐珠考靈曜 天果命湯 白虎戲朝

鸞鷲鳴岐山周語 麒麟見豫章 狐藁房 狼銜鉤

詳應運篇 赤烏銜珪子墨 赤烏銜書呂氏春秋 鳥王命明 魚鳥

有卯 冀隹白芴 赤雀止昌戶尚書中候 黃魚雙躍尚書

赤雀五至 白魚入舟尚書中候 赤魚遊護 赤人出

洛年紀 武王伐紂十而龜燔說苑 靈龜服 神龜出 五

鐸啓號於晉陵晉書 棧鐘告成於會稽 文昌殿朱草

自生 臨平湖草木自除 卧柳生枝漢書 斃梓擢秀

梧桐常生 枯梓更榮豫章記 卧有光耀 神

光照室魏木紀 光耀滿室 留飲酒售漢書 賣麵大售

肆伐大商會朝清明 天錫武王黃鳥之旗天兵之

法誅紂之事子墨 爰茲發迹 斷蛇奮旅 大雨洒兵

大風落兵 邢丘大雨 昆陽雨注 盟津波罷

滹沱冰合東觀漢記

符命三帖案本作圖書所載與符命同

天錫洪範尚書云天乃錫禹洪範九疇彝倫攸叙 河出馬圖明王之理

不愛其道地不愛其寶故 受命之藏氣識 荀卿傳祕

後漢荀卿臨終戒子統曰吾緇帙中有先祖所傳

之尹敏增圖識尹敏博通經史帝使校圖識敏增之

披皇圖 稽帝文 握乾符 叶靈圖文並見 秘文

愛寶 河洛開奧 符命用出 玄德升聞 皇天
眷命 以識命官 有道則見 龍馬出圖於河伏
羲觀之以畫八卦 神龜負書於洛夏禹衍之以成
九疇

漢司馬相如封禪文曰伊上古之初肇自昊穹之
生民歷選列辟以迄于秦率邇者踵武逖聽者風聲
紛紛歲耗湮滅而不稱者不可勝數也繼昭夏崇號
謚略可道者七十有二君書曰元首明哉股肱良哉
因斯以談君莫盛於唐堯臣莫賢於后稷后稷創業
於唐堯公劉發跡於西戎文王改制大行越成故軌

跡夷易易遵也湛恩龐鴻易豐也憲度著明易則也
垂統理順易繼也是以業隆於禘祫而崇冠乎二后
未有殊尤絕跡可考於今者也然猶躡梁父登泰山
建顯號施尊名大漢之德逢音峰涌源泉沕滴曼羨芴
魄四塞雲布霧散上暢九垓下泝八埏昆蟲闔惺迴
首面內然後囿騶虞之珍羣徼麋鹿之怪獸導一莖
六穗於庖犧雙觚共觝之獸招翠黃乘龍於沼欽哉
符瑞臻茲猶以為德薄不敢道封禪蓋周躍魚隕航
休之為燎此之為符也以登介丘不亦愆乎進讓之
道何其爽與於是大司馬進曰陛下仁育羣生義征

不諛德侔往初功無與二意者泰山梁父設壇場望
幸蓋上帝垂恩儲祉將以慶成陛下謙讓而弗發也
摯三神之歡缺王道之儀羣臣愿焉夫修德以錫符
奉符以行事不為進越也故聖王不替而修禮地祇
謁款天神勒功中嶽以章至尊皇皇哉斯事天下之
壯觀王者之不業不可貶也願陛下全之俾萬世得
激清流揚微波飛英聲騰茂實前聖之所以永保鴻
名而常為稱首者用此宜命掌故悉奏其儀而覽焉
於是天子沛然改容曰俞乎朕其試哉乃遷思迴慮
總公卿之儀詢封禪之事詩大澤之博演符瑞之富

遂作頌曰自我天覆雲之油油甘露時雨厥壤可遊
滋液滲漉何生不育嘉穀六穗我穡曷蓄匪唯雨之
又潤澤之匪唯徧之我汜布濩之名山顯位望君之
來君乎君乎侯不邁哉般般之獸樂我君囿白質黑
章其儀可嘉收收穆穆君子之態蓋聞其聲今視其
來厥途靡從天瑞之徵茲爾於舜虞氏以興濯濯之
麟遊彼靈時孟冬十月君徂郊祀馳我君輿帝以享
祉宛宛黃龍興德而升正陽顯見覺悟黎蒸於傳載
之云受命所乘依類託寓喻以封巒披藝觀之天人
之際已交上下相發允荅聖玉之事兢兢翼翼故曰

於典必慮衰安必思危是以湯武至尊嚴不失肅祇
舜在假典顧省闕遺此之謂也 漢揚雄劇秦美新
曰上罔顯於義皇中莫盛於唐虞邇靡著於成周仲
尼不遭用春秋因斯發言神明所祚兆民所託罔不
云道德仁義禮智獨秦崛起西戎因襄文宣靈之僭
跡基孝公茂惠文奮昭莊至政破從擅衡并吞六國
遂稱乎皇帝盛從軼儀韋斯之邪政馳驚起翦恬賁
之用兵剗滅古文刮語燒書弛禮崩樂塗民耳目遂
流唐漂虞滌殷蕩周黷除仲尼之篇籍自勒功業改
制度軌量咸稽之於秦紀是以耆儒碩老抱其書而

遠遜禮官博士卷其舌而不談二世而亡何其劇歟
帝王之道兢兢乎不可離已夫能貞而明之者瑞祥
瑞回而昧之者極妖愆故若古者稱堯舜威侮者陷
桀紂况盡汛掃前聖數千載功業專用已之私而能
享祐者哉會漢祖龍騰豐沛奮迅宛葉自武關與項
戮力咸陽創業蜀漢發跡三秦克項山東而帝天下
槩秦政摻酷尤煩者應時蠲始儒林刑辟歷紀圖典
之用稍增焉秦餘制度項氏爵號雖違古而猶襲之
是以帝典闕而不補王綱弛而未張逮至大新受命
上帝還資后土顧懷玄符靈契雲動風偃震聲日景

炎光飛響盈塞天淵之間乃奉若天命窮寵極崇與
 天剖神符地合靈契創億兆規萬世卓哉煌煌真天
 子之表也若夫白鳩丹鳥素魚斷虵方斯茂矣是以
 發秘府覽書林遙集乎文雅之囿翱翔乎禮樂之場
 胤殷周之失業紹唐虞之絕風懿律嘉量金科玉條
 煥爛照耀靡不宣臻振鷺之聲充庭鴻鸞之黨漸階
 俾前聖之緒布濩流行而不韞積郁郁乎煥哉天人
 之事盛矣鬼神之望允塞紹少典之苗著黃虞之裔
 帝典闕者已補王綱弛者既張炳炳煒煒豈不懿哉
 而述前典巡四民迄四岳增封太山廣禪梁甫斯受

命者之典業也崇嶽滄海通瀆之神咸設壇場望受
 命之臻焉海外遐方信延頸企踵圓面內嚮喁喁如
 也帝者雖勤讓惡可以已乎宜命賢哲作典引一篇
 以示來人摛之罔極令萬世常戴巍巍履栗栗嗅馨
 香含甘實鏡純粹之至精聆清和之正聲則百工伊
 凝庶績越熙荷天衢提地輦斯天下之上則已庶可
 試哉

典引後漢班固典引曰陶唐舍胤而禪有虞亦命夏
 后稷契熙載越成湯武股肱既周天乃歸功元首將
 授漢劉俾其承三季之荒末值亢龍之災孽懸象闔

而恒文垂彝倫敦而舊章缺高光二聖辰居其域赫
赫聖漢巍巍唐基沂測其源乃先孕虞育夏甄殷陶
周然後宣二祖之重光襲四宗之緝熙神靈日照光
被六幽仁風翔于海表威靈行乎鬼區盛哉皇家帝
世德臣列辟功君百王榮鏡宇宙渙揚寓內是以來
儀集羽族於觀魏肉角馴毛宗於外囿擾緇文皓質
於郊升黃輝采鱗於沼甘露宵零於豐草三足騫翥
於茂樹若乃嘉穀靈草奇獸神禽應圖合謀窮祥極
瑞者朝夕罔牧日月邦畿卓犖方州羨溢乎要荒昔
周姬有素雉朱鳥玄秬黃葵音之事耳君臣動色左

右相趨濟濟翼翼我我如也啓恭館之金滕御東序
之秘寶是時聖上固已垂精游神苞舉藝文屢訪群
儒俞咨故老與之斟酌道德之淵源飾覈仁義之林
藪以望元符之臻焉將緝萬嗣揚洪暉奮炎景扇遺
風播芳烈久而逾新用而不竭汪汪乎丕天之大律
其疇能亘之哉唐哉皇哉皇哉唐哉

頌魏傳遐皇初頌云尋盛德以降應著顯符于方臻
積嘉祥以待期儲鴻施於真人昔九代之革命咸受
天之休祥匪至德其焉昭匪至仁其焉章懿大魏之
聖后固上天之所興應靈運以承統排閭闔以龍升

帝三 卷二十四 十四
據皇象以闡化順帝則以播音遵陽春以行施揆四
時以立信運聰明以舉善宣柔惠以養人於赫我后
邁德如神化不朞月令不浹辰於是天地休豫靈祇
歡欣嘉瑞雲集四靈允臻甘露宵零於宮庭醴泉冬
涌於中原白雉素鳥丹芝朱魚鱗集羣萃不可勝書
信應天之美瑞受命之靈符也然後覽公卿之讜議
詢百僚之典謨天子乃登彫輦戴羽蓋佩玉鏘鏘鑾
聲噦噦拜上皇告受位兆休祥導神氣於是建皇初
之上元發曠蕩之明詔青災肆赦盪滌瑕穢崇設九
賓溥延公卿嘉羞千品俎豆充庭金石具懸鐘鼓畢

作歌九功舞八佾鴻澤普皇恩洽民欲得神望塞

叙後漢傅幹王命叙曰昔在唐虞之禪列于帝典殷
周之代叙于詩書天之歷數昭焉著明周篤后稷公
劉積德行仁至乎文武遂成王業雖五德殊運或禪
或征其變化應天與時消息其道一也故雖有威力
非天命不授雖有運命非功烈不章自我高祖襲唐
之統受命龍興討秦滅項光有萬國世祖攘亂奄復
帝宇人鬼協謀徵祥煥然皆順乎天而應乎人也然
則帝王之起必有天命瑞應自然之符明統顯詐豐
懿之業加以茂德成功賢智之助而後君臨兆民爲

神明所保佑永世所尊崇未見連叙無紀次勲澤不加於民而可力爭覬覦神器者也豪桀見二祖無尺地之階爲專智力乘釁而起不知天祚聖哲帝王自有真也哀哉非徒闇於將來又不考之於既往矣自開闢已來姦雄妄動不識天命勇如蚩尤強如共工威如夷羿然皆從分橫裂爲天下戒又况淺智小才勇不足畏強不足憚未有成資而敢失順視不軌之事也哉夫行潦之流不致江海之深丘垤之資不成太山之高魚鼈之類不希雲龍之軌一官之守不經天人之變當上斧之末英雄四起而鄧禹耿弇識世祖之福祚羸糧間行進其策謀遂荷肯附之任享佐命之寵張玄慕蘇秦蒯通之業周旋囂述西說竇融言未及終而梁統已誅之矣禹弁見命祚之兆其福如彼張玄蔽逆順之理其禍如此審斯二事趣舍之分明矣且世祖之興有四一曰帝皇之正統二曰形相多異表三曰體文而知武四曰履信而好士加之以聰明獨斷達於事機發策如神應視遠如見近偏旅首進摧莽軍百萬之衆單師獨征平河北萬里之功識鄧隆之將敗知劉興之必死然猶乾乾日昃博采訓咨拔吳漢於小尹擢馬武於行伍寵功臣以兼

國之爵顯卓茂以非次之位言語政事文學之士咸盡其材致之宰相權勇畢力於征伐措紳悉心於左右此其所以成大業也高祖方娠有雲龍之表其始入秦五星同軌以旅于東井在天之符也世祖之徵符其詳可聞也其初育則靈光鑒于室隩嘉禾滋于邑壤其望舊廬有火光之異其渡滹沱有河合之應西門君惠先識其諱彊華獻符千里同驗劉歆改名而隕其身王長錯卦而見吉兆故王遵謂之天授非人力也覽廢興之運會觀徵瑞之攸祚審天應之萌兆察人物之所附念功成而道退無非次而妄據後之人誠能昭然遠覽曠然深悟收莽述之闇惑忠鄧耿之弘慮好謀而要成臨事而知懼距張玄之邪說思在三之明數則福祿衍於無窮亦世不失其通路矣

論後漢班彪王命論曰昔在帝堯之禪曰咨爾舜天之歷數在爾躬舜亦以命禹暨于稷契咸佐唐虞光濟四海弈世載德至于湯武而有天下雖其遭遇異時禪代不同至于應天順民其揆一焉是故劉氏承堯之祚氏族之世著于春秋唐據火德而漢紹之始起沛澤則神母夜號以彰赤帝之符由是言之帝王

卷三十四
之祚必有明聖顯懿之德豐功厚利積累之業然後
精誠通於神明流澤加於生民故能爲鬼神所福嚮
天下所歸往未見運世無本功德不紀而得僭起在
此位者也世俗見高祖興於布衣不達其故以爲適
遭暴亂得奮其劍遊說之士至比天下於逐鹿幸捷
而得之不知神器有命不可以智力求悲夫此世之
所以多亂臣賊子者也若然者豈徒闇於天道哉又
不睹之於人事矣夫餓饉流隸饑寒道路思有短褐
之襲擔石之蓄所願不過一金終於轉死溝壑何則
貧窮亦有命也况乎天子之貴四海之富神明之祚

可得而妄處哉故雖遭罹厄會竊其權柄勇如信布
強如梁籍成如王莽然卒潤鑊伏鑕烹醢分裂又况
么麼不及數子而欲闇干天位者乎是故駑蹇之乘
不騁千里之塗燕雀之儔不奮六翮之用梲柅之材
不荷棟梁之任斗筭之子不執帝王之重易曰鼎折
足覆公餗不勝其任也當秦之末豪傑並起共推陳
嬰而王之嬰母止之曰自吾爲子家婦而世貧賤今
卒富貴不祥不如以兵屬人事成少受其利不成禍
有所歸嬰從其言而陳氏以寧王陵爲漢將而母獲
於楚有漢使來陵母見之謂曰願告吾子漢王長者

帝三 卷二十四
必得天下子謹事之無有二心遂對漢使伏劍而死以固勉之夫以匹婦之明猶能推事理之致探禍福之幾而况大丈夫之事乎是故窮達有命吉凶由人嬰母知廢陵母知興此二者帝王之分決矣蓋在高祖其興也有五一曰帝堯之苗裔二曰體貌多奇異三曰神武有徵應四曰寬明而仁恕五曰知人善任使加之以信誠好謀達於聽受見善如不及用人如由已從諫如順流趨時如響赴當食吐哺納子房之策拔足揮洗揖酈生之說悟成卒之言斷懷土之情高四皓之名割肌膚之愛舉韓信於行陣收陳平於亡命英雄陳力羣策畢舉此高祖之大略所以成帝業也若乃靈瑞符應又可略聞矣是以王武感物而折契呂公覩形而進女秦皇東遊以厭其氣呂后望雲而知所處始受命則白蛇分西入關則五星聚故淮陰留侯謂之天授非人力也歷古今之得失驗行事之成敗取舍不厭斯位符瑞不周斯度而苟昧權利越次妄據外不量力內不知命則必喪保家之主歿天年之壽遇折足之凶伏斧鉞之誅英雄誠知覺寤收陵嬰之明分絕信布之覬覦拒逐鹿之瞽說審神器之有授母貪不可幾為二母之所笑則福祚流

于子孫天祿其永終矣 魏陳王曹植魏德論曰元
 氣否塞玄黃憤薄星辰亂逆陰陽舛錯四海鼎沸蕭
 條沙漠武皇之興也以道凌殘義氣風發神戈退指
 則妖零順制靈弧雲舉則朝揚播越唯我聖后神武
 盖天威光佐掃辰彗北彎首尾爭擊氣齊率然乃電
 北席卷千里隱乎若崩嶽盱乎若潰海愠彼蠻夏蠢
 爾弗恭脂我蕭斧簡武鍊鋒星陳而天運振耀乎南
 封荆人風靡交益影從軍蘊餘勢襲利乘權蕩鬼區
 於白水擒矯制乎遐川仰屬目于條支踰弱水之滌
 浚薄張騫於大夏笑驃騎於祁連其化之也如神其

養之也如春柔遠能邇誰敢不賓憲度增飾日耀月
 光跡存乎建安道隆乎延康於是漢氏歸義顧音孔
 昭顯禪天位希唐放棄上猶謙謙弗納也發不世之
 明詔薄皇居而弗泰蹈北人之清節美石戶之高介
 義貫金石神明以興坤祇致祥乾靈效祐於是羣公
 卿士功臣列辟率爾而進曰昔文王三分居二以服
 事殷非能之而弗欲蓋欲之而弗能况天網不禁皇
 綱圮紐侯民非復漢萌尺土非復漢有故武皇創跡
 於前陛下光美於後蓋所謂勲成於彼位定於此者
 也將使斯民播秬鬯殖靈芝鋤六穢挹醴滋遂乃凱

帝三 卷二十四
風迴焱甘露匝時農夫詠於田壠織婦吟而綜絲黃
吻之齟含哺而怡鮐背之老擊壤而嬉古雖稱乎赫
胥曷若斯之大治乎于時上富于春秋聖德汪濊奇
志妙思神鑒靈察方將審御陰陽增耀日月極禎祥
於遐奧飛仁風以樹惠旣遊精萬機探幽洞深道遙
六莛兼覽儒林抗思乎文藻之場囿容與乎道術之
彊畔超天路而高峙階清雲以妙觀將參跡於三皇
豈徒論功於大漢天地位矣九域清矣皇化四達帝
猷成矣明哉元首股肱貞矣禮樂旣作興頌聲矣固
將封泰山禪梁甫歷名川以祈福周五方之靈宇越

九於往素踵帝皇之靈矩流餘祚於黎蒸鍾元吉
聖主 隋李德林天命論曰有娥玄鳥商以興焉
姜嫄巨跡周以肆焉邑姜夢帝隋以興焉古今三代
靈命如一天下之重不可妄據軒初四帝周餘六王
藉勢因基自取而不得也孟軻稱仲尼之德過於堯
舜著述成帝者之事弟子備王佐之才墨不代蒼泣
麟歎鳳栖栖汲汲雖聖達而莫許也蚩尤則黃神抗
衡共工則黑帝就敵項羽誅秦摧漢宰神州角逐爭
驅盡威力而無就也其餘欻起妖妄何足數者若使
四凶執八元之誠三監懷九臣之志韓信彭越深明

帝子之符孫述隗囂妙識真人之出尉迥同謳歌之類王謙比獄訟之民福祿蟬聯胡可窮也而違天逆物獲罪人神嗚呼此前事之大戒矣誅夷烹醢歷代共尤僭逆凶邪時煩獄吏其不戒慎何哉蓋積惡旣成心自絕於善道物類相感理必至於誅戮天奪其魄鬼惡其盈故也大帝聰明羣臣正直耳目監於率土賞罰參於國朝輔助一人覆育兆庶豈有食人之祿受人之榮苞藏禍心不殲盡者也必當執法未處其罪司命已除其藉自古明哲慮遠防微位尊而心愈下祿厚而志彌約納寵思之以懼道高守之以恭

克念於此則姦回不至謙光滿復義在知幾吉凶由人妖不自作風沙則主雖愚蔽民盡知歸有苗則始爲跋扈終而大服漢南諸國見一面以從殷河西將軍率五郡而臣漢故能招信順之助保太山之安也

魏邲鄆淳上受命述曰伊上天闢載自民主肇建歷聽風聲陶唐爲盛虞夏受終殷周革命有禪而帝有代而王禪代雖殊大小絲同於是漢歷在魏赤運歸黃也是故大魏之業皇耀震霆肅清宇內萬邦有截師義翼漢奉禮不越飭躬戮力茂亮弘烈樹深根以厚基播醇澤以釀味含光而弗耀戢翼而弗發

將俟聖嗣是遂是達聖嗣承統爰宣重光陳錫裕下
民悅無疆三神宜釐四靈順方元龜介玉應龍粹黃
若云魏德據茲以昌爾乃鳴玉陟壇三摺以俟既受
休命龍旋鳳跼煌煌厥暉穆穆容止臨下有赫允也
天子既踐帝位納壘要紱太常司燎升炮告類珪璋
峩峩髦士棣棣踰踰聖躬御策以莅巍巍乎崇功顯
顯乎德容信帝者之壯業天休之所鍾也于時天地
咸和日月光精氛祲不作風塵弭清凡在壇場之位
舉日乎廣庭莫不君臣和德咸玉色而金聲屢省萬
機訪謀老成治詠儒墨納策公卿昧且孜孜文場乾

乾務在諧萬國敘彝倫而折不若懷遠人混六合之
風納于仁壽之門刑錯靡試偃伯靡軍然後乃勒功
岱嶽升中上玄斯因我皇之大摹思心之所存也

表魏邯鄲淳上受命述表曰臣聞雅頌作於盛德典
謨興於茂功德盛功茂傳序弗忘是故竹帛以載之
金石以聲之垂諸來世萬載彌光陛下以聖德應期
龍飛在位其有天下也恭已以受天子之籍無爲而
四海順風若乃天地顯應休徵祥瑞以表聖德者不
可勝載鑠乎煥顯真神明之所以祚命世之令主也
凡自能言之類莫不謳於野執筆之徒咸竭文思

獻詩上頌臣抱疾伏蓐作書一篇欲謂之頌則不能
雍容盛懿列伸玄妙欲謂之賦又不能敷演洪烈光
揚緝熙故思竭愚稱受命述

○帝誕一

藝文類聚初學
記雜採成篇

榮氏曰人皇兄弟九人生於荆馬山身九色 帝王
世紀曰燧人之世有大人迹出雷澤華胥履之生庖
犧氏於成紀也 又曰神農氏母曰始媼有喬氏之
女名女登遊于華陽有神龍感女登於常羊生炎帝
又曰黃帝母曰附寶見大電繞北斗樞星暎郊野
感附寶孕二十月生黃帝於壽丘 又曰少昊母曰

女節黃帝時有大星如虹下流華渚女節夢接之意

感而生少昊是為玄囂

河圖曰生
日帝朱宣

又曰顓頊母景

僕蜀山氏女為昌意正妃謂之女樞金天氏之末孫

光之星貫月如虹感女樞幽房之宮生顓頊於若水

首戴干戈

又曰陶唐之世握登見大虹意感生舜

於姚墟

尚書帝命驗曰姚氏繼華感樞注
日舜母感樞星之精而生舜重華

又曰禹

母有莘氏曰志是為修己山行見流星貫昴意感慄

然又吞神珠薏苡胷坼而生禹

蜀王本紀曰禹母含
珠孕禹坼臍而生於

塗山開山圖注云女狄暮及石紐山下泉中
得月精如雞子愛而吞之遂孕十四月生禹 又曰

主癸之妃曰扶都見白氣貫月意感以乙日生湯故

名履字天乙是謂成湯 又曰漢昭靈后名含始遊

浴池有玉雞銜赤珠出刻曰玉英吞此者王含始吞

之生高祖 史記曰高祖母媪嘗息大澤之陂夢與神

已而有娠 春秋合誠圖曰堯母慶都出觀三河奄

然陰風赤龍與慶都合生堯 又曰赤帝之精生于

翼 詩合神霧曰慶都與赤龍 春秋元命苞曰姬昌

蒼帝之精位在房心 宋均注曰蒼 史記曰帝嚳少

妃有娥氏女簡狄以春分玄鳥至之日祀于高禘有

玄鳥遺其卵簡狄吞之孕生契為殷始祖 列女傳曰

嚳之少妃有娥氏之女浴於玄丘之水有玄 又曰

帝高陽氏元妃姜嫄見大人之跡履之欣然若感而

生后稷棄之寒冰之上鳥翼覆之又棄之隘巷牛羊

乳之又棄之平林之上人收養之為周始祖 漢武

內事曰景帝坐崇方閣上有丹霞起赤龍盤棟間使

王夫人居之改為猗蘭殿後王夫人夢日生武帝

漢武故事曰王皇后納太子宮得幸有娠夢日入懷

東觀漢記曰光武父欽令濟陽有武帝行宮上將

生欽開後殿居之時有赤光之異室中盡明 詳符

晉中興書曰中宗元皇帝初誕有神光之異一室盡

明所藉橐如始刈 搜神記曰初孫堅夫人孕而夢

帝誕

月入其懷既而生策及權在孕又夢日入其懷以告
 堅曰昔姪策夢月入我懷今也又夢日入我懷何也
 堅曰日月者陰陽之精極貴之象吾子孫其興乎
 楚辭注云禹治水時自化為熊以通輟轅之道塗山
 氏見之而慙遂化為石時方孕啓禹曰歸我子於是
 石破北方而啓生其石在嵩山

帝誕二書錄

天命玄鳥降而生商 有娥友將帝立子生商 誕
 彌厥月先生如達 不圻不副無災無害 生此文
 王 篤生武王 履帝武敏歆以上並電繞樞星帝黃

星流華

吳履大人跡人

白氣貫月易成姚氏感樞星堯修已感流星禹感

龍而生堯感蛇而生 女登感神炎帝慶都感龍堯夢

大人 夢長人 黃雲覆蓋堯雷電晦冥漢高修

已吞神珠禹含始吞赤珠漢高玄鳥銜卵契玉鷄銜

珠漢高二十月生黃帝 十四月堯帝生 赤光照

室 青雲如蓋 夜有赤光光生有神光宋武黃帝

生壽丘 顓頊生若水 庖犧生成紀 夏后生塗

山 文王生岐山 武王生元氏 神農生石穴

帝堯生石乳 禹生石紐 啓生碨石 嘉禾九穗

武藁草成禾 鳳凰來集 甘露降樹

○奇表一 藝文類聚初學 記雜採成篇

帝王世紀曰庖犧氏蛇身人首有聖德 王延壽魯靈光殿賦曰伏犧蛇身女媧蛇軀

又曰帝女媧氏亦風姓也亦蛇身人首 春秋命歷敘曰有神人名石年

一曰女希 又曰神農氏人身牛首 春秋命歷敘曰有神人名石年

又曰黃帝龍顏 又曰帝顓 蒼色大眉戴玉理注 玉理猶玉英神農也

項首戴干戈 又曰帝嚳母不覺而生齟齒有聖德 春秋元命苞曰帝嚳戴干是謂清明宋均注曰干盾也

又曰堯母曰慶都孕 謂清明宋均注曰干盾也

十四月而生堯於丹陵名曰放勳鳥庭荷勝眉有八

采豐下銳上 尚書大傳曰堯八眉八眉者如八字春秋元命苞曰堯眉八采是謂通明歷

象日月璇璣玉衡 春秋合誠圖曰赤帝之為人視之體長八尺七寸 又曰舜目重瞳

故名重華 春秋元命苞曰舜重瞳子 是謂滋涼而

多見 孝經援神契曰舜龍顏重瞳大口 手握袞注

重瞳象電多精光也 大口象斗屋口也 握袞手中

有袞字喻從勞苦起受袞飾致大祚也 雜書靈准聽

骨表如日者也 推讀鍾鑑鍾平輕重者也 握

石推謂知璇璣之道也 懷神珠喻有聖智也 又曰

伯禹虎鼻大口兩耳參漏首戴鈎鈐曾有三斗足文

履已故名文命字高密身長九尺二寸 洛書曰有人

代戴成鈴懷玉斗鄭玄注懷璇璣玉衡之道姚氏以

禹曾有三斗 尸子曰禹長頸鳥喙面目亦

賢矣天下從而 又曰成湯豐下銳上哲而有髯倨

身而揚聲長九尺臂四肘 元命苞曰四肘是謂神肘

洛書曰黑帝子湯長八

尺一寸

又曰文王四乳是謂含良蓋法酒旗布恩

舒明

酒者乳也能乳天

又曰文王昌龍顏虎肩身

長十尺曾有四乳

春秋合誠圖曰蒼帝之為人望之廣視之專而長九尺一寸

河圖云蒼帝方面赤帝圓面白帝廣面黑帝深面

春秋元命苞曰武王齟齒是謂剛強宋均注曰重齒

以為表

河圖提劉曰帝季日角戴勝斗曾龜背龍

股長七尺八寸明聖寬仁好士主軫

春秋孔演圖曰其人日角龍顏

姓卯金合仁義

史記曰為人隆準而龍顏美鬚髯左股有七十二黑子

漢書曰昭帝

諱弗陵武帝子也母趙婕妤好本以有奇異得幸及生

帝亦奇異

又曰宣帝足下有毛卧居數有光耀

東觀漢記曰光武隆準日角大口美鬚眉身長七尺

三寸

又曰建武四年皇子陽生豐下銳上顏赤色

有似堯上以赤色名之曰陽年十三通春秋上循其

頸曰吳季子

晉中興書曰中宗元皇帝諱睿字景

文世祖咸寧二年生於洛陽及長白毫生日角之左

眼有精曜唯侍中譙國嵇紹少而異之謂其友曰琅

琊王毛骨非常殆非人臣之相

吳志曰孫權字仲

謀漢以孫策遠修貢職遣使者劉琬加錫命琬語人

曰吾觀孫氏兄弟雖各才秀明達然皆祿祚不終唯

中弟孝廉形貌奇偉骨體不恒有大貴之表又最壽

策薨以事授權 江表傳曰孫堅為下邳丞時權生
方頤大口目有精光堅異之以為貴相及堅亡策起
事江東權常隨從性度弘朗仁而多斷好俠養士

奇表二 北堂書鈔

蒼帝望之大視之博白帝望之明視之義 河太昊地

形人首 太帝人身牛首 帝系譜 成湯倨身揚聲 帝王世紀

必義連珠 神農戴玉 春秋命曆序 伏羲龍狀 重華日

衡 雜書靈准聽 戴天履陰 豐下銳上 成湯 帝嚳戴干 元命苞

帝堯荷勝 帝王世紀 周文望羊 堯眉八采 元命苞 舜目重

環玉柄 戴玉英 神農 神農大眉 春秋命曆序 文王虎

大禹虎鼻 按神契 姬昌鳥鼻陰準 禹耳三漏

湯臂四肘 文王四乳 並元命苞 帝舜斗口 按神契 秦

始虎口 河圖 帝堯鳥庭 帝王世紀 漢祖斗曾 河圖 長頸鳥喙

越王長目鳥喙 武王駢齒 元命苞 顓頊駢幹 龜背龍

股 河圖 龍行虎步 手握袞字 舜 手文握兵 垂手

下膝 蜀先主 足下有毛 漢宣帝 履翼 堯 履屨 禹 履矛 尚書 大

足 春秋繁露 立髮垂地 魏明帝 鬚垂委地 庖義 鬚長七尺 搜神記

生而有髮 漢書 美鬚髯 漢高祖 紫髯 獻帝春秋 白毫 王隱晉書 湯身

長九尺 舜身長六尺 並帝王世紀 堯身長十尺 孔叢子 周

文八尺三寸 高祖七尺八寸 河圖 無如季相 史記 容貌

壯麗東觀瞻視非常 毛骨非常晉中宗睇盼煒如風

骨不恒

○帝系一藝文類聚初學記雜採成篇

史記曰帝嚳高辛氏者黃帝之曾孫也父曰蟠極蟠極父曰玄囂玄囂父曰黃帝自玄囂與蟠極不得在位 國語曰玄王勤商十有四葉而興賈逵注曰玄王謂契湯之祖契謂之玄王 帝王世紀曰舜姚姓也其先出自顓頊顓頊生窮蟬窮蟬有子曰敬康敬康生句芒句芒有子曰橋牛橋牛生瞽瞍瞽瞍妻曰握登生舜 又曰秦嬴姓也昔伯翳為舜主畜多故賜姓

嬴氏孝襄公始修霸業壞井田開阡陌天子命為伯至昭襄王自稱西帝攻周廢赧王取九鼎至莊襄王滅東西周莊襄王崩政立為始皇 又曰漢出自帝堯劉姓也豐公生執嘉即太上皇也 東觀漢記曰世祖光武皇帝高祖九世孫出自長沙定王定王生春陵節侯春陵本在零陵郡節侯孫孝侯以土地下濕元帝時求封南陽蔡陽白水鄉因故國名曰春陵

帝系二北堂書鈔

絲絲瓜瓞 本枝百世 帝作邦作對並毛詩 后稷勤周 后稷始基 纂堯之緒 出自唐帝 三世舉

孝廉

○幼智一

藝文類聚初學
記雜採成篇

史記曰黃帝姓公孫氏生而神靈弱而能言代神農氏 帝王世紀曰帝嚳生而神異自言其名曰爰漢書曰昔周成以孺子繼統而有管蔡四國流言之變孝昭幼年卽位亦有燕蓋上官逆謀之亂成王不疑周公孝昭委任霍光各因其時以成名大矣哉蜀志曰先主舍東南角有桑樹童童如小車蓋先主少時與諸宗兒戲曰吾當乘此羽葆蓋車 幼童傳曰太祖幼而智勇年十歲嘗浴於譙水有蛟來逼自

擊蛟乃潛退於是畢浴而還弗之言也

幼智二

北堂書鈔

生而能言

黃帝

生而言名

帝

產而能書

隨巢子

幼總百神

黃帝幼而聰達

帝

幼克大事

漢和帝

茂質紀淑

東觀岐嶷之

姿 問南頓何在

林語

答長安近日

林語

八歲能屬文

魏文

是書詐也

漢昭

名理不減

晉孝武帝

○潛晦一

采藝文類聚

韓子曰歷山農者侵畔舜往耕耨年而耕者讓畔河濱漁者爭坻舜往漁耨年而漁者讓長東夷之陶者苦窳舜往陶耨耨年而器以牢 漢書曰孝宣皇帝諱

帝三 卷二十四
詢字次卿武帝曾孫戾太子孫也太子納史良娣生
皇孫皇孫納王夫人生皇帝號曰皇曾孫生數月遭
巫蠱事太子良娣皇孫王夫人皆遇害曾孫坐繫郡
邸獄邴吉為廷尉監治巫蠱憐曾孫之無辜使女徒
乳養私給衣食至後望氣者言長安獄有天子氣上
遣使皆殺之內者令郭穰夜至郡邸獄吉拒閉不得
入曾孫賴吉得全因遭赦 東觀漢記曰光武仁智
明達多權略樂施愛人在家重慎畏事勤於稼穡兄
伯升好俠笑上事田作比之高祖兄仲高才好學然
亦喜遊俠鬪雞走馬其知閭里姦邪吏治得失時會

朝請舍長安尚冠里

潛晦二 北堂書鈔

潛龍勿用陽在下也 周易 尺蠖之屈以求伸也 周易 以懿
文德 舜居深山與鹿豕遊 孟子 隱於芒碭 史記 尤樂杜
鄠 雷雨不迷 舜 上有黑雲 告歸之田 告歸鄉
里 耕於歷山歷山之人皆讓畔漁於雷澤雷澤之
人皆讓居陶於河濱作什器於壽丘就時於負夏 舜
躬耕白水 光武 講學長安 習讀書傳 秋冬弋獵
歸於頓丘 就驢給費 為縣送徒 為春陵訟租
為泗上亭長 漢高 為洛北簿尉 一年成聚三年成

都

○殷憂一

采藝文類聚

竹書紀年沈約注云王嘉季歷之功錫之圭瓚秬鬯九命為伯既而執諸塞庫季歷困而死因謂太丁殺季又曰執季歷於塞庫羈文王於玉門鬱悒之情辭以作歌其傳久矣帝王世紀曰夏桀無道臯諫者湯使人哭之桀囚湯使於夏臺而後釋之諸侯由是咸叛桀附湯同日貢職者五百國三年而天下咸服又曰文王雖在諸侯之位襲父為西伯紂既囚紂紂曰誰謂西伯聖者食其子羹尚不知也漢書曰宣帝始立謁見高廟大將軍光參乘上內嚴憚之若芒刺在背後張安世代光參乘天子從容肆意甚安晉中興書曰惠帝幸臨漳中宗從駕是時中宗叔父東安王繇為成都王穎所害懼禍及謀出奔其夜月明禁衛甚嚴不能得去有頃天暴風雨晦冥微者四散中宗因得脫晉陽秋曰簡文帝雖登祚內不自安初熒惑入太微尋廢海西公至是熒惑猶在太微帝惡之謂郗超曰命之脩短大所不計故無復往

紂曰誰謂西伯聖者食其子羹尚不知也漢書曰宣帝始立謁見高廟大將軍光參乘上內嚴憚之若芒刺在背後張安世代光參乘天子從容肆意甚安晉中興書曰惠帝幸臨漳中宗從駕是時中宗叔父東安王繇為成都王穎所害懼禍及謀出奔其夜月明禁衛甚嚴不能得去有頃天暴風雨晦冥微者四散中宗因得脫晉陽秋曰簡文帝雖登祚內不自安初熒惑入太微尋廢海西公至是熒惑猶在太微帝惡之謂郗超曰命之脩短大所不計故無復往

日事耶超云大司馬温方内固社稷外布經略非常
之事臣以百口保之超假還東帝謂之曰致意尊公
家國之事遂至於此由吾不能以道匡樹思患豫防
媿歎之深言何能喻又誦庾闡詩云士痛朝危臣哀
主辱泣下霑衣漣如相續 琴操曰文王備修道德
百姓親附文王有二子周公武王皆聖是時崇侯虎
與文王列為諸侯德不及文王常嫉妬之乃譖文王
於紂曰西伯昌聖人也長子發中子旦皆聖人也三
聖合謀君其慮之乃囚文王於羑里將欲殺之於是
文王四臣散宜生等周流海内經歷豐土得美女二

人水中大貝白馬朱鬣以獻於紂陳於中庭紂立出
西伯文王在羑里時演易八卦以六十四作鬱厄之
辭困於石據於蒺藜乃申憤以作歌曰殷道溷溷沒
濁煩兮朱紫相合不別分兮迷亂聲色信讒言兮炎
炎之虐使我愆兮幽閉牢窞由其言兮遘我四人憂
勤勤兮

殷憂二 北堂書鈔

或多難以固邦國或殷憂以啓聖明 履重剛 蒙
大難 果行育德 易 興亡同難 履虎尾 易 憂而不
困 或憂而光 繫夏臺 湯 囚羑里 文王 執於塞庫

羈於玉門

詳前篇

丙吉乳養

漢宣

張賀供給

智勇俱困

亡失家屬

持滿外向

鈔期奮戟

稱漢使者

馳入韓信壁

稱使者入傳舍

以水飲水

壘竈

炙衣

蕪萋豆粥

光武

滹沱麥飯

光武

平城為匈奴所圍

漢高

河陽為津吏所止

晉中

典書

丁公接兵

漢書

曹洪授馬

魏太

乘馬得脫

典論

泣而升車

晉中

典書

